

4/25/55



## حکایات علی شاکلہ (المقامات)

## عاول القنصل





## بِسْمِ اللَّهِ الرَّحْمَنِ الرَّحِيمِ

### أحوال العباد في زمن العناو

٢٠٠٥/١١/١٧

الجزء الأول

٢٠٠٥/٥/١

## البداية

الإنسان ووجوده ساعات يبقى حر وساعات  
تحده حدوده.. وده تاريخ ممدود من  
الجدود.. وحكايته على الأرض من البداية.. التحكى عنها كام  
حكاية.. من أيام ما كان جسمه عريان وعمره ما كان عرقان ولا  
خجلان ولا شغلة ولا مشغلة وحياته آخر بغددة.. وجتته متمددة  
في شمس وهو.. والكون كله متسخر له وما فيش حد فيه  
يشاركه.. والملاك سجد له.. وهو اللي حول حياته لما بص للمتحرّم  
عليه.. فأكتر انه هيزيده وما يعرفش انه هينقصه.. حيخسره وحيضيع  
مكسبه.. وما كانش بيحسد حد.. وإبليس بيحسده.. واتوعد بيه  
وقيده بسلاسل رغبته وشهوته.. بعد ما كان عايش بحريته وبورقة  
توت هددته وكشف عورته.  
وابتدا ابن آدم يحلف بغربته.. بعد ما انطرد من جنته ونزل دنيته.. و

الجريمة في خلفته.. والأخوات طمعوا في حنة منهم.. وأقندر دمهم.  
وكتسرت العباد.. وكل زمن يعدي عليهم فيه فترات يبقوا فيها في  
عناد.. ودخل حياقم قاموس ألفاظ إبليس.. ده صاحب كيف وده  
هليس.. الغش والتدليس والكذب والتقليس.. وتكثر التفاليس في  
مال وفي مبدأ وقيمة وتظهر الجريمة.. ونحتاج قوانين تحكم فيها.  
وحكايتنا تشبه المقامة العربية.. بس بلغتنا العامية.. عشان نقرب من  
الناس شوية.. وبطلها.. زي الراوي في المقامات.. لما أبو زيد  
السروجي كان راوي للحريري.. وعيسى بن هشام كان لبديع  
الزمان الهمذاني.. واسمه صبر الزمان.. في كل دهاليز العباد يلف  
ويدور.. ودائماً تلاقيه محشور.. وعمره ما طاله الغرور.. وما كانش  
يحب انه يكون مشهور وفضل انه يكون مغمور.. يتخفى بطربوش  
أو عمة أو طرطور.. المهم إن ايده تطول حالة العباد في زمن  
العناد.. وتلاقيه في كل الأزمنة والأزمات.. ويعيش كل  
الشخصيات.





## ما فيش حريينام من غير عشا

"صبر الزمان" حكى وقال.. لما هذا الحال.. في حي البطال.. المحصور  
أهله في التعداد أهم بطالة وعاشين على حد الكفاف راح بصفته  
مسئول عن تعداد السكان.. واختار ده المكان.. عشان وارد في  
الإحصائيات انه حي اللي عاشين وهما أموات.. وقابل الست  
"نحاة" قاعدة قدام باب بيتها تندب حالها وتدعي على اللي وصلها  
لده الحال.. قرب منها ومسى عليها ويصت له بطرف  
عنيها.. رحبت بيه وقالت له إذا كنت مندوب الإسكان.. خطي  
العتبة عليك الأمان.. قالها انه مندوب التعداد.. بعد ما كانت لينة  
قلبت للعناد.. وصرخت في وشه وكانت حتنط في كرشه.. وقالت  
أنا "نحاة" أم الولايا السبع بنات.. في عين العدو محسوين عاشين  
وفي الإحصائية معدودين لكن ميتين.. الجوع والبرد والشقا.. عاوز  
إيه تاني بقي.

قالها وهو بترعش وطوله ينكمش.. أنا جاي للخير.. ومعايا النواية  
اللي تسند الزير.. لقاها غيرت اللون واتشعبطت في البنطلون  
وقعدته جنبها وبينت حزنها.. وهات يا عياط وولولة واشتغلت عليه

شغل الجلاجلا..جوزها مات وسابلها هم متل..ومرة على الجار  
ده بتميل..وهات يا سلف وتكثر الديون لأجل تستر الولايا.  
وشوية وجم اسم الله عليهم وحارسهم..سبعة وخراط البنات  
خارطهم..الكيرة عشرين والباقي متسلسلين لحد الصغيرة اربعتاشر  
سنة..لابسين هدوم على قدهم..وساتره الجمال اللي  
تحتهم..ومسوا على أمهم..ولما شافوه اختشوا على دمهم..وابتدوا  
يشكو همهم وتلطم أمهم وتقول يا رب الستر من عندك..ده أنا  
مش قادرة..ومهما اكون صابرة..الحمل عليا ثقيل..يا مين  
يشيل..ودخلوا البيت وكل واحدة اتدارت جنب الحيط وراحوا  
فاتحين أكياس بلاستيك كانت معاهم..ومدوا ايديهم  
جواها..وظلعوا من خيرات الله..سمك وكابوريا وجبري..خضار  
ولحم شمري..وفرشوا الطلية وايديهم مش مستنية وهات يا أكل  
وخطف من بعضهم..واحدة بتحب اللحمه والتانية بتموت في  
الجمبري والتالثة بتعشق السمك وأمهم تقولهم يا بنات كله يملك  
..مد ايديك معانا يا أستاذ..ولما عنيه لعت زي الازاز..قالت له  
صلي على النبي في قلبك..كل اللي جم قلبك ماحدش منهم خطي

عتبة الباب..ده إحنا عيشتنا هباب..وأوعى يغرك الأكل المشكل  
ألوان..ده بقايا أكل التخمان اللي بيشتغلوا عندهم.  
ومن الكلام عرف أنهم كلهم شغالين خدامين عند الناس  
الهائي..يلموا بواقي أكلهم من على السفرة..الناس الكفرة اللي  
بيبقوا من أكلهم بعد ما يتملى كرشهم..أكل يأكل بلد بخاها.  
وركز عليه على ايديهم وهما بياكلوا..لقى غوايش الذهب بتلمع  
تحت كمامهم..وأهمهم تزغر لهم يداروا ايديهم لما الذهب ظهر  
غصب عنهم..وابتدا يفتح دفتره ويقيد أسمائهم..لما اتأكد إن كل  
واحدة منهم بتاخذ اقله تلتمة جنيه..يألف حسرة عليك يا سعت  
البيه..وهو محسوب من الطبقة المتوسطة اللي دخل أعلى واحد  
فيهم خمسميت جنيه..يا دوب يقضوا الشهر غموس..ووشهم  
عبوس.  
والست لما نحت القر اللي في عنيه..قالت له يصص تحت رجله..وما  
يسئش النية بيهم..ده ربنا اعلم بيهم..والقمة اللي بياكلوها  
واهدمه اللي بيلبسوها سحت وشحاة وتحلف بالتالعة عيشتهم  
كرب.

بص لها وقالها..انتي حثقوليلى يا ست..أنا عارف إن حالتكم على  
الجنط..وما فيش حد بينام من غير عشا في بر بلادك يا مصر.



\*\*\*\*\*

### قيام الليل في زمن الوبل

"صبر الزمان"..حكى وقال..لما كان صغير ويسمع  
الموال..وحلقات ذكر في مندرة البيت..جنب الغيط..لما الناس  
كلها تروح بيوقا بعد صلاة العشا..والكل اتعشى من لقمة سمينة  
أكلها مع عياله..ذكر بط..ياكله وينط..ويرمي نفسه على فرشته  
فوق الفرن في أيام الشتا..والدفا..من بقايا وقيد..كان للنار بيقيد  
ويحمسي الفرن..وفطيرة مشلطة..متفتة في لبن محلوب طازة..ما  
اتعباش لا في علية ولا ازازة..وهات يا شخير..بعد ما طلب من ربه  
العفو والمغفرة عن اللي صدر منه في هار يومه.

وكلام الشيخ الطيب..يخلي كل واحد منهم دمه قريب..لما يتكلم  
عن الرسول عليه الصلاة والسلام..لما يصلي قبل ما ينام..وبعد ما  
ينام..قيام الليل في التلت الأخير منه..لما تكون الدنيا سكون..يقوم

كل منهم يتوضأ..ويسلم ويحوقل..وعلى ربه يتوكل..ويصلي  
صلاة القيام..ويا سلام..على الراحة النفسية التي يحس بها..لما  
يقوم لصلاة الفجر في زاوية البلد ويصليها..ويطلع مع نور الصباح  
أول ما لاح..يسرح على غيظه..وما يرجعش بيته..إلا بعد صلاة  
العشا..ومن ربه اختشى ويقول..يا رب انك العفو تحب  
العفو..فاعف عنا..ويحس إن بيوم فاره وليله اهنى عشان ما  
عصاش ربه.

ويعمر الزمان على "صبر الزمان" ويطلع من قريته على عاصمة  
الكهربا المنورة..يدرس في الجامعة وودانه ما هياش سامعة آذان  
الفجر..من الناس اللي صاحبة طول الليل..قال أمال امق هيكون  
تلت الليل..اللي يصلح لصلاة القيام..يا سلام..ده أنا وقعت في  
ايدين من لا يرحم..ويقعد بترحم على أيام قريته..اللي كل وقت  
له احترام..النهار حركة وزرع وبيع وشرا..وما فيش غش ولا  
افترا..والمغرب هدوء للراحة الليلية..والليل ضلام وسكون والكل  
في بيته مكنون..لا وقت لراديو أو تليفزيون بعد شقا اليوم.  
ولما جه عليه الشهر الفضيل..حس انه طويل..من المشقة

والسعب.. وحركة الناس والعربيات اللي ما بتهمدش.. راكين في  
أتوبيسات رافعين أعلام عشان يتفرجوا على الماتش.. يعني راح  
وقت صلاة الظهر والعصر.. ولما يكون فريق عاصر الثاني عصر  
ويتعادلوا.. يبقى فيه اكسترا تايم.

والناس طول رمضان.. زي الأصنام.. قاعدين قدام  
التلفزيون.. برنامج ومسلسل وفوازيرو الوقت يطير لحد ما يؤذن  
الفجر.. مش لاقى وقت سكون الليل عشان الناس كلها صاحية  
وسهرانة.. على القهاوي وقدام التلفزيون.. انتهى السكون وما  
عدش بيقوم الليل ولا يؤدي الصلاة.. يبكي بدمع العين على القرية  
وأهلها ونهارها اللي فيه حدود.. وفي الليل كله نائم  
ومهدود.. يقوموا في التلت الأخير من الليل.. يصلوا القيام ويستنوا  
الفجر وكل واحد على مصلحته والبركة قهل عليه في زرعه وقلعه.  
وقال ليه العباد في عناد مع نفسهم.. ما يعرفوش يقسموا  
وقتهم.. الليل داخل في النهار واليوم يروح في الهزار.. وما كانش  
قدامه خيار.. غير انه يقضي رمضان في قريته.. ويصلي في  
زاويته.. ويستحمل مشوار السفر أربع أيام في الأسبوع

اللي فيهم محاضرات..وراح..واستراح لما شم ريحة الزرع  
الفواح..وجري على بيتهم..قلع هدومه..ونسى همومه..وافتكرو  
صومه ورمح على زاوية البلد..وفي صبر وجلد..صلى الجماعة  
وسط المصلين اللي كلهم وداعة..وسلم عليهم وسلموا عليه..وبعد  
الصلاة طار على الغيط..باس أبوه وحضن أخوه..ورمى نفسه  
وسط الزرع ونام على ظهره وبص للسما..حس إنها غير السما  
اللي اتعود يشوفها في المدينة ودوشة ولاد الدنيا..واستنى لحد  
الغروب..لما الشمس اتدارت ورا الزرع وانتهى وقت المنع ووجب  
الإفطار..راح الزاوية..قدموله تلت تمرات..وأكلهم وسط  
الدعوات بعودة يا شهر رمضان..وحس انه لصيامه صان..وعلى  
بيتهم عدل..شم ريحة أكل الفرن اللي طبخاه أمه..بالحب اللي بيته  
لمه.

وسمع آذان العشا..وسط الهدوء..راح الزاوية..والناس غاوية تقول  
ذكر بعد التراويح..وليل الشهر الفضيل..يحلى الذكر والمواويل  
عن افضال الشهر الكريم..الرجالة قاعدة في المنادر ويتخدم عليهم  
الحريم..ينسون وحلبة وقرقة ولحد السحور والكل ميهور وهو

مسحور بجو كان له مشتاق..بعد فراق.

واتسحر باللي ربنا بيه جاد..تمام الرضا وما فيش عناد مع  
العباد..ونام وفي التلت الأخير قام اتوضا..ورجحة مية الوضوء  
متعطرة ببركة الشهر الفضيل وأمه نورت القناديل وملت القفل  
وحطت فيها الماورد..وأبوه قرا الورد..وظلعوا على الزاوية..نيتهم  
صافية وصيامهم لله خالص.

والسبلد هادية..لا دوشة ولا ضجيج..ولا تليفزيون ولا دش..ولا  
أصوت بتوش..والطيور في السما بتوحد ربها..وبعودة يا رمضان في  
بلاد الناس الطيبين..الصائمين المصلين القائمين في ليل سكونه هدوء  
ولما يظهر الضوء..لأول النهار..خلية نحل في الغيطان تدعي ربها  
يصلح زرعها ويبارك يوم الحصاد..في الدنيا والآخرة.



\*\*\*\*\*

### الموسيقى والأغنية وارتباطاتها الشرطية

"صبر الزمان"..لما عدى عليه الزمان من غير ما يحس..قعد في بيته  
وحس انه بيخس..من التفكير في الزمن اللي فات..عدى كام يوم



تلات..اللي هو اسعد أيامه في كل أسبوع..وغصب عنه نزلت  
الدموع..مقهور..موجوع..نفسه الزمان يرجع تاني..واللي وصل  
له من أماني..عاوز يرجع يفكر ازاى حققها..وفتح  
الراديو..والاصطباحة ندية..مع موسيقى لبرنامج وأغنية..نفس اللي  
كان يسمعه زمان..وكان الوقت ما عداش..مع انه ما بقاش إلا  
القليل.

يا صباح الخير يااللي معانا..يا نسمة الصباح يا معطرة  
الملاح..بالسلامة يا حبيبي بالسلامة..همسة عتاب..وشرب بق  
عتاب..والدمع من عينه ساب..ذكريات لساعة الصباحية..الأيام  
المدرسية والكلية..والوظيفة الحكومية..لما كان بيتشعبط في  
الأتوبيس..وأيامه الاخرانية قبل ما يطلع على المعاش..وسواق  
عربيته ما جاش..بعد ما بقى مدير عام..ويرجع يفر الأعوام..يلاقى  
إن الكلمة لأغنية والموسيقى لبرنامج..حفرت في وجدانه..وكونت  
كيانه..ما يقدرش ينكر إنها آثرت فيه وكونت مسار حياته  
واتجاهاته..خطوبته وجوازه وخلفته لعياله..ومش مهم الأغنية  
بتقول إيه أو موسيقتها عاملة ازاى..خلفية حياته وخصوصاً

النأي..كان يسمعه وهو مشغول..يفطر وقدامه طبق الفول..أو  
نازل على السلام والراديو مفتوح في بيت الجيران..أغنية بلبل  
حيران..وفي الأتوبيس بانادي عليك..وأهواك..وغنوة من هنا  
وهناك..ويا هناك لما المخ يحفظها في الذاكرة..لحظات سعيدة  
ولحظات تعيسة..ولما نسمع أغانيها نفتكر الزمان باليوم والساعة  
والدقيقة..حقيقة ما كانش له خاطر فيها..اتسريت للوجدان مهما  
كان مش راضي عنها..أغاني بتفكره بموت أمه..لما أم كلثوم تغني  
الرضا والنور والصبايا الحور..لما كانت أمه بتصحيه من عز نومه  
عشان السحور..ولا ساعة الفطور لما يسمع سيحة رمضان لولي  
ومرجان..ولياي رمضان..واللعب في الحارة..مع ابن الجار والحارة  
ومحمد فوزي يغني ويقول هاتوا الفوانيس يا ولاد..وأمه تندد عليه  
وهو معاه في عناد..آد لو الزمن جاد..وترجع أيام الأمجاد..ما  
كانش عصي أمه ولا غضب ربه.

والجسم يرتعش..لما يسمع اغنية تفكره بأول حب..انت  
عمري..والقلب ما كانش بأمرى..لأ بأمر الحب..ولما وقع زي  
المدب في حب أنوار..اللي خلت ليله ظلام..لما عرف إنها

مستجوزة..وجت له يوم ومبوزة..واعترفت له بالحقيقة..وكانت  
أغنية..وكانت أغنية جبار..وتخونوه..والقلب الخالي ظلموه.  
والصحة تعطل..لما جاله مرض في القلب..ويسمع أغنية عبد  
الحليم..جاية في السليم على الألم اللي يتألمه..لما قال في يوم في شهر  
في سنة..وما كانش عدى من عمره غير أربعين سنة..والأفلام  
وموسيقها..والمسلسلات وتترافقا..في مسلسل الأيام..وحكاية طه  
حسين..والدمع على الخدين..لما يحلم بموت احمد زكي..كان بيمثل  
جيل قريب من جيله..ويا ويله..اللي يفتكر اللي حفره الزمان في  
الوجدان..ويوم عقد القران..وأغاني الأفراح اللي كانوا مشغلينها  
في الريكوردر..واتمخطري يا حلوة يا زينة..ومبروك عليك يا  
معجباتي..ياه للدرجة دي بتأثر الأغاني..والموسيقى كمان في فيلم  
رد قلبي..لما كان بيحب بنت الجيران "أشجان"..وعزلوا بعد ما  
اتشعبط فيها..وهو لسه في ابتدائي..وعليا وعلى أعدائي ولازم  
أروح ليها..لكن فات الأوان وسابت المكان..والحب بقى في خبر  
كان..لكن مآثر في الوجدان..من كلمة والخان..ليلي مراد.  
وأغاني الشباب..عمرو دياب..ومصطفى قمر..لما افتكر بناته وهما

لسه في فترة الشباب.. وهات فلوس يا بابا عشان نجيب  
شريط.. كلمات في موسيقى مش باين معانيها من الضرب  
والتخيط.. وطيط.. طيط.. عشان يتضحك عليهم ونسخر  
منهم.. وتلومه أمهم.. عاوزين يعيشوا زماهم باللي لايق لهم.. دي  
آمالهم.

ولما مرت عليها سنين.. اتحفرت في الوجدان.. بتفكره بالبنات بعد ما  
اتجوزوا وسابوه.. نسوا الشرايط وانشغلوا في حياتهم.. بطلعها  
ويسمعها والدموع نافورة.. واتحلت الفزورة.. مهما كان الكلام  
والموسيقى والأحان.. لو حتى أي كلام.. دخلت المخ واتسجلت في  
مركز الذاكرة.. وكل ما يسمعها يفتكرهم.. يخفتهم  
ولعبهم.. بيجامتهم وجزمتهم اللي باقية ذكرى من زمن  
فات.. ويفتكر يوم الثلاث.. لما كان بياخذهم.. يزوروا نيتهم ومرة  
خالهم ومرة عمتهم.. يوم السعد والحظ عنده.. ولما رجع بالذاكرة  
عشان يفتكر حبه لليوم ده بالذات.. افتكر سوق الثلاث.. وهو لسة  
صغير.. قبل ما يتلف ويتدور وعمره ما كان يتصور إن ريحة الطيور  
والخضار حتفكره بأبوه اللي كان يصمم ياخده معاه عشان يتودك

لما يبقى أب مع الأيام.. وفيلم لا أنام.. لما شافه في السيما وهو صغير.. وانبهر بألوانه في زمن كان الأبيض والأسود اللون الطاغي على الأفلام.. وأغنية فيروز يا شط إسكندرية يوم ما راحوا زاروا عمته هنية.. لما انبهر برضه بالمدينة المارية.. وبحرها وريحه اليود ارتبط بالأغنية وكأن الأمواج بتغنيها.

والإنسان قمر عليه الأيام.. منها اللي رضى عنه ومنها اللي خجلان منه.. ويقعد مع نفسه عشان يحياها من ذاكرته.. لما كان خايب في الحساب.. ويتربع من المدرسة أول ما تخش من الباب.. وتزل فيه ضرب وسباب.. عشان ما حفظش جدول الضرب.. ورغم انه اتخرج من الجامعة.. ولسة ما حفظهوش ويكره أغنية محمد عبد الوهاب.. عشان يفكره بالمدرس.. لما كان يسمع كلماتها ساعة الفسحة.

وكل ما يسأل واحد من الأصحاب.. يلاقي انهم متفقين على أغاني معينة ومختلفين على أغاني تانية.. وكل لحظة وثانية.. في عمر كل واحد منهم.. تختلف عن التاني.. الأفكار مش واحدة.. والمشاعر مش متحدة.. والبيئات مختلفة.. والقلوب مش متلفة.. واللي يحب

حاجة..التاني بيكرهها.

لكن تفضل الأغنية موسيقتها..وذكرياتها..سواء رضينا بيها أم لم نرضى..متسربة لسرائينا..ومكونة وجدانا..فرحنا وحزننا..ضحكتنا وآهاتنا والله يبارك اللي كتب كلماتها وحط ألحانها..والإذاعة اللي ذاعتها لنا..واللي ملاها الاسطوانات والشرايط..ومراتي عملت الرز شايط..زي الغنا الهابط اللي باسد وداني لما اسمعه..بيفكرني بجدول الضرب لما كنت باسمعه واتلخبط في جدول اتناشر وحرام عليك ياللي ناشر دي الأغاني..اللي حتبقى في وجدان ولادنا عماد بلادنا..وعلى الله ما يهدوا عمدانه.



### العتب على النظر

"صبر الزمان"..لما حكى وقال..اتغير الحال ونظري بعد ما كان ستة على ستة..ويلقط الرز من طبق الفتة..اصله ما يحبس إلا رزها..وأمه اعتادت طبخها..ومع الزمان ونمو الأبدان..النظر في

نقصان..والعيب على النظر..والنصيحة بأكل الجزر..وبقى زي  
الأرنب من كتر أكل الجزر..وراح للدكتور..وقاله لازم من  
النضارة..عشان ترجع لعبتك النضارة..وكان لازم  
يلبسها..والحاجات اللي ما كانش يشوفها..بقى كاشفها..ورجع  
ينقي الرز من الفتة..ويطلع بذر الفتة..ويسبس للقطعة اللي كانت  
عاملة زي الفار.

وشوية شوية..لقى كل أهل الحطة لابسين نضارات..كبار  
وصغار..واكثرهم من الصغار..ولاد عم مختار..اللي كان نظره زي  
البومة..وعضو على طول الزمان..في استطلاع شهر رمضان بالعين  
المجردة.

والعيال في الحضانة..أو لسة طالعين من الحضانة..على طول يلبسوا  
نضارات..وتكثر الفتاوي والمقولات..سوء تغذية..العاب الاتاري  
والتلفزيون..والكمبيوتر..والنت..سوا للراجل أو للست..لكن  
الحكاية فلتت والحلول فشلت..وبقينا قدام حل وحيد..النضارة.  
والبنات بالذات..حسو إن النضارة بتضيع جمال وشهم وتقلل

نسبة الخطاب اللي يتقدموا لهم.. ومنهم اللي بتستغنى عن النضارة  
وبتقاوح.. ويتمشي في خط سيرها.. مش شايفة العريس اللي  
قاطرها.. ولما يكلمها ويبين حسن النية.. توافق على طول.. ويروح  
بيتهم عشان يطلب ايديها.. وتتدارى ورا الباب وتلبس النضارة في  
عنيها.. تلاقى شكله يعلم بيه رينا.. اصلها كانت ماشية من غير  
نضارة.. وعشان تتحل العبارة.. تلبس النضارة وتطلع  
تقابلها.. يشوفها يتخض.. ينفذ من مكانه ويقول بربريز  
عربية.. مش هي ديا اللي شفتها ومشيت وراها وقطرتها.. وياخذ  
بعضه ويجري وديله في سنانة.

والمصيبة لما النضارة تتكلف ميات.. وتقع على الأرض وتبقى خمس  
حات.. وعقبال صاحبها ما يعمل ميزانية.. يفضل يحسس طول ما  
هو ماشي.. والجمعية لسه ما قبضتهاش.. ولازم يتعود بمشي من غير  
نضارة.. لحد ما طلعت النضارة مجهولة المصدر.. من بلاد لينا  
بتصدر.. وما تعرفش دخلت البلاد ازاى.. والخوف من اللي لسه  
جاي.. والنضارة ما يتعداش تمها عشرة جنيه.. وجميع الأذواق  
والمقاسات.. ولو انكسرت ديتها شوية جنيهات ما تعضلش ميزانية



أصحاب الفتات.. والتحذير من أمر خطير.. إنها بتسحب النظر من العينين.. والناس ما يهيمهاش ويقولوا اهو إحنا عايشين.. أعيش شايف وأموت وأنا ضريب.. وأبقى ضامن في الجنة سرير. وشوية وطلعت التقلية.. عدسات جميع الألوان.. واللي عنيه لوها مش باين.. ركب عدسات خضرا.. والبنت خضرا.. بنت عطيات العمشة.. بقت شبه بنات ولاد بره.. واللي اتولد ونظره ضعيف كانت عيشته مرة.. لكن العدسات.. غيرت كل الهيئات اللي كان شايفها.. كان شايف أبوه قصير لكن طلع طويل.. والفار ما كانش شايفله ديل.. وكأنه اتولد من جديد.. واتعلم شيل الحديد. ونعمة وسبحان من أوحى لعباده من العلماء.. إن الحياة تبقى في عين الناس صفاء وهاء.. والولد دخل الكليات العسكرية بعد ما كان أمله فيها مفقود.. بعملية ليزر أعادت للنظر الوجود.. وبطلت النظارات والعدسات.. وبقي تصحيح النظر بعملية.. الليزر هو بطلها ومضمونة فيه في الميه.. وتعمل عمليات الميه.. الزرقا والبيضا.. لعم حسين والشيخ عويضة. ورجع ولاد الحارة آخر نضارة.. وبعد ما كانوش شايفين تحت

رجليهم..تندب عينهم..زي الرصاصة..ويكثر البصاصة وبعد ما  
كانش بيشوف البنات الحلويات..بقت عنيه جوة جسمهم..يحدد  
رسمهم..وابتدت البنات قتم بنفسها..من شعرها لرجليها..واسم  
الله عليها وحواليها..وبقى الشباب العمشان..الأوائل في  
النشان..وما عتش العتب على النظر..ولا لازمة لأكل الجزر.



### فرحة العباو.....متحدوة في مناسبات

"صبر الزمان"..لما سافر اليونان..بصفته مندوب لشركة  
الحبوب..عشان يتعاقد على صفقة..شركته عليها متفقة..ولما وصل  
كان يوم الحد..إجازة أسبوعية..للعاملين بالشركة..راح  
الفندق..لقاه مليون من ناس جاية تقضي الوبك اند..وكأنه فرح أو  
عيد..أكل وشرب وسكر ورقص..وهو قاعد يبص..ولما عرف انه  
لا يوم عيد ولا مناسبة وطنية ولا اجتماعية..مجرد إجازة أسبوعية.  
حط ايده على خده وندب حظه..على شعب بلده اللي مكتوب  
عليه ما يفرحش إلا في الأعياد..الكبير والصغير..وستة أكتوبر

وتلاتة وعشرين يولية وبنات الأعياد.. يحوشوا من قوتهم طول  
السنه.. جمعيات.. وساعات سلفيات عشان يمتعوا نفسهم.. ولما رجع  
من بره.. قال لازم يغير نمط حياته.. ويمتدع مراته وولاده.. بإجازة  
الويلك اند.. ولما جه يوم الجمعة.. عزمهم كلهم.. على فسحة زي  
فسحة العيد.. ولبسوا اللبس الجديد.. وخرجوا في الشارع.. والعيال  
عاوزين مراجيح.. مش ده عيد؟!!

لكن صاحبنا صمم إن اليوم مناسبة وعيد.. دي إجازة نهاية  
الأسبوع.. أمال اللي بره يقضوها ازاى.. ده فيه ناس بتروح  
هاواي.. ويحوا بعضهم ويقولوا هاي وباي باي.

وخدهم وراح السيما.. لقاها فاضية.. الناس مش فاضية.. وان كانت  
فاضية جيوهم فاضية.. ما عملوش حسابهم على إجازة نهاية  
الأسبوع.. الويك اند.

خدهم وراح الملاهي.. لقاها منفضة من الناس.. والكناس.. بكس  
حواليها.. سأله فين الناس.. قال تلاقيهم زي النسل في الأعياد.. لما  
يقبضوا العدديات.. وهات يا صرف هات.. ده إحنا في آخر الشهر يا  
أستاذ.

ورجع قفاه يقمر عيش.. واستنى تيجي مناسبة من المناسبات.. لحد ما  
هل شهر رجب.. ويوم ٢٧ منه موسم ويوم صيام.. وبعده شعبان  
وليلة النص والدعا وصلاة القيام.

وجه رمضان.. فرحة بكل مظاهره اللي اتنقلت لنا من  
الفاطمين.. كنافه وقطايف.. وياميش.. وما تحيش انه ما يحيش للعيال  
فوانيس ومحط قدام باب بيته فانوس كبير ويكتب بالطباشير هل  
هلالك شهر مبارك.. وعلق الشراشيب.. زينة من ورق ملون..  
وأول الشهر حيمون بالفلوس وبالنقدية.. وليالي سعيدة هنية.. شوية  
عرقسوس وتمر هندي.. وجميع أصناف المخللات.. وتكثر المشهيات  
لكل الصائمين.. الناس كلهم مشتركين في فرحة بمناسبة  
متحددة.. والرغبة عنده متجددة.. يعيد أيام الشهر الفضيل.. والباقي  
على العيد الكبير قليل.. وفيه من أول ذو الحجة تسع أيام  
صيام.. وقال تبقى تمام لو حاول يرجع فيهم أيام رمضان.

وقبل الشهر ما يهل.. كان لكيس فلوسه يحل.. وجاب دكر بط  
لأول يوم صيام.. وسأل عن بتوع الكنافه والقطايف.. من فرحته ما  
كانش شايف ولقى الكنافه ومالقاش القطايف.. سأل الراجل عن

صنعتها..دله على الطريقة..ومش عاوز يضيع ولا دقيقة..وطلع  
على تحت الريع يسأل عن الفوانيس..قالوله بعودة لسه بدري..لقى  
في الورشة فانوس كبير مكسر..وفوانيس صغيرة..وقال  
عال..وطلب من الراجل يصلح له الفانوس الكبير ويوضب  
الصغيرة..وعدى عليه بعد يومين..لقاهم تمام..وراح صلى في جامع  
الإمام.

وجهز نفسه عشان يحقق كل اللي في نفسه..ويخلي التسع أيام  
صيام وكأنهم من أيام رمضان..ودخل على سوبر ماركت كبير لقي  
قمر الدين وتين وجوز زيب..قال من رواحك يا رمضان يا  
حبيب.

ولما جه الميعاد..أول ذو الحجة..مراته طبخت دكر بط ومعا  
عجة..وعلق الفانوس على باب شقته..ومسك العيال الفوانيس  
الصغيرة..والشراشيب من الدور اللي ساكن فيه لحد الدور  
الأرضي..قابلته الحاج شردى..وقاله..هو رمضان حل يا صبر  
الزمان..ضحك وقال ما هي أيام صيام..تفرق إيه عن صيام  
رمضان..وما تنساش تصلي معانا التراويح بعد العشا..والراجل

بص له وكنتم ضحكته وقال ربنا يشفي.

و"صبر الزمان"..سعادته ما تتقدرش..يرجع أيام سعيدة في غير  
مناسبتها..طالما بتكمل لأسرته سعادتها..وكان نفسه المدفع  
يضرب..بس ده ما يقدرش عليه..واتلم عيال العمارة ومعاهم  
سكان الحارة..وقطعوا الشراشيب..والفانوس الكبير كان له  
نصيب..وكسروه بأيديهم وقعدوا يتريقوا عليه ويقولوا..صبر  
الزمان بقى محه بتنجان..عاوز يرجع لنا رمضان قبل الأوان.

فرت الدموع من عنيه ودبت الرعشة في ايديه..وقال هو أنا  
ضربهم في إيه..حتى لو أنا مجنون..وبعد ما عصر على الشورية  
اللمون..نفسه اتسدت..وقال لازم فرحتنا تبقى متحددة في  
المناسبات اللي فيها إجازات..محدداتها الدولة..بصفة  
رسمية..والاحتفالات الشعبية لازم يبقى عليها اتفاق من الناس  
كلها..ولو الواحد حاول يخرج عن قضيب القطر..ما ينوبه إلا  
القهر..وبلاش من الفرحة في الصيام في ذو الحجة..مع انه  
صيام..لكن غير صيام رمضان اللي له فرحته وتقاليده..وكويس  
انهم ما بلغوش مستشفى المجانين.



## يا خاوم.. مين يخدرك

على وزن يا وارث مين يورثك..حكى صبر الزمان وهو  
زهقان..وقال الحكاية دي لا أنا فيها حاقد ولا حاسد..بس مفروس  
من الزمن اللي طالع نازل ونازل طالع وكل جسمه والع ويقول  
كمان صاحب الدكان بقى صبي والصبي اشترى الدكان..إيه اللي  
جرى يا زمان..ياللي أنا صابر عليك..بتديني ضهرك..وأنا باصص  
عليك..مش بعيني..لكن بعينك.

ورجع بالذاكرة للأيام العابرة..لما كان ساكن في حي شعبي..كان  
ولدت شقي ولعي..وعينه على اللي رايع وجاي..وعارف سكان  
حيهم كلهم..اللي كانوا حريمهم يصحوا من النجمة..أم صاحبه  
"علي" وأمه في نعمة..كأنهم جيش خارج يحارب..أو رايعين لمعمل  
حقل تجارب..ولما سأل أمه..قالت حال كل واحد منهم يغمه..ناس  
غلابة وتسعى على رزقها..شغالين في بيوت ناس هاي..اللي خدامه  
واللي طباخه واللي غساله..ورجالتهم كسالى..يستنوا حريمهم لما  
يجوا آخر النهار..وتسمع الخناق والنقار..عاوز مصروف من  
مراته..عشان يروح يقعد على القهوة ويعزم صحابه وافتكرو لما

صاحبه "علي"..كان كل يوم يجيب أكل أشكال وألوان..من اللي  
أمه بتطبخه ويعزمه..ويستغرب لما أبوه يقرب وياكل..أكل له ريحة  
وشمخة..ونفس أمه "نعمة"..ويرجع يقول لأمه..تقول طباخ السم  
بيدوقه..ومن حقها تدوق من أكلها..ما هو الناس اللي بتشتغل  
عندهم..لا حاملين هم حد ولا حد حامل همهم..بيصرفوا ويعزقوا  
ولا يهمهم.

ومر الزمان..على صبر الزمان..لما أهالي الأحياء الشعبية..بنصفوا  
شوية..ويعزلوا على أماكن نظيفة..بعد ما الجنيه بقت قيمته زي  
التعريفة..ولما أمه كبرت في السن وما عدتش قادرة على  
الهم..طلبت منه يجيب لها شغالة..والمالبة عال..والحال بقي غير  
الحال..وصبر الزمان بقي مدير عام لشركة الأحلام.

وسأل عامل عنده عن شغالة..قاله..عليك وعلى مكتب "علي  
طواله"..احسن مكتب تخدم..عنده من الرجالة  
والحرير..بواين..سفرجية..طباخين..وجناينة..شغالين من كل  
جنس وملة ودين..الاسم رن في ودانه..قال يمكن يكون تشابه  
أسماء.. "علي طواله"..ابن "نعمة" الطباخة..معقول؟!



وما كدبش خبر وراح المكتب..لقاه في عمارة كبيرة..وعليه يافطة عريضة..مكتوب عليها "علي طوالة" لتوريد الشغالين والشغالات..قال أكيد هو..وبص لجوه..لقاه قاعد على مكتب مكيف ولا بس ومتقيف..والمكتب مليان ناس من جميع الأجناس..بشرة سودة وصفرة وحمرة..حب يدخل عنده..لقاه منور اللمة الجمره..وسكرتيرة عنيتها والعة زي الجمرة..وقالت طلباتك..عندنا فلبيين..ومغربي وروسي..وفيه كمان سيرانكي وحشي وسوداني..وكل جنسية لها فتتها النقدية تبدأ من مية وعشرة دولار شهرية..غير الخوافز..وتقول كمان الأكل جايز..واكثر حاجة سعرها في العاللي خمسميت دولار شهرية..ولبسها وأكلها وفسحتها وعلاجها..برة الحسبة.

"صبر الزمان" دماغه لفت..وقالها..أنا عاوز أقابل "علي طوالة"..شخبطت فيه وقالت تقصد "علي بيه طوالة"..هو مش فاضي دلوقتي..قالها بس انتي قوليله صاحبك بتاع زمان..صبر الزمان..سمحت له يخش له..لما شافه قابله بالأحضان..وشوية ودخلت عليهم أمه "نعمة"..منورة ولا معة..ولا بس على آخر

موضحة..وكان الزمان ما عداش عليها..وبعد ما سلمت عليه..قالت له يا ابني يا "علي"..الخدمة السودانية اللي بعتهالي كسلانة..والسرلانكية عيانة..والحيشية زهقانة..شوف لي يا بني واحدة من بنات الروس وطباخ تركي بيرطن عربي..وسفرجي نوبي.

قالها من عنيا يا أما انتي تؤمري..و"صبر الزمان" دماغه لفت..قال سبحانه الله خدمة زمان..عندها عشرة بيخدموها..وكان أبوها من بشاوات زمان..وهي من عزبة أبو قردان..وجوزها أبو ودان..صايح زمانه..اللي عايش عوالة على مراته. وبعد ما خلص الكلام مع أمه..قاله طلباتك يا "صبر الزمان"..سواق ولا سفرجي..شغالة ولا طباخ..مربية أطفال ولا جليسة كبار.

"صبر الزمان" بلم لما قرا التسعيرة اللي مكتوبة ومتعلقة على الحيطه..قال معقول إحنا في مصر..إحنا بنعيش في أي عصر..خدامين زمان بقم هوانم..وعبروا اكثر من العوالم وربك وحده اللي عالم..إيه اللي نضفهم بالشكل ده..وخصوصاً وان علي

خرج من سنة ستة..أيام ما كانوا ساكنين في الحنة.  
وسأله تاني..إيه طلبك يا "صبر الزمان"..قاله..أنا كنت جاي  
أزورك لما قرئت اليا فطة اللي على المكتب..اصل أنا كنت طالع  
لدكتور السنان..اللي في الدور السابع..الدكتور "علي رافع".  
وخرج من المكتب يضرب كف على كف..وحس إن عقله  
اتقف..وقال يا خادام مين يخدمك..بعد الزمن ما كان بيحوجك.

### ممنوع الاقتراب والتصوير

"صبر الزمان"..زمان..أيام حرب الاستراف..بص رشاف جنبنة  
سبحان الخلاق في مكان متطرف..قال أنا في حقيقة ولا  
باخطرف..ولما كانت هوايته التصوير ودائم اللف والتدوير على  
الأماكن الجميلة..ياخد صورة بالكاميرا بتاعته الصغيرة..وشجرة  
في الجنينة عليها عصفورة..وبعد ما اخذ الصورة..لقى نفسه  
متحوط بتلت رجالة..سحبوه في عجالة..وهات يا سين وهات يا

جيم..انت مين ورايح فين..وطني ولا جاسوس..انت مش عارف  
إن المكان ده ممنوع الاقتراب منه أو تصويره..ده مكان  
عسكري..انت مين ياللي شبه الجمبري..طب على الأرض  
ساكت..والكاميرا من ايده سابت..وخدوا الشريط وحرقوه ولعنوا  
أمه وأبوه..والآخر سابوه..لما اتأكدوا انه حسن النية وابتدا ياخذ  
باله..لما يروح لمكان يحرك خياله.

وتلف الأيام وتدور ويتخرج من كلية الآداب صحفي..ويجي عليه  
الدور..يسعين صحفي في جريدة النور..وعليه يجيب أخبار  
طازة..عن الناس اللي اخر لذاذة..فنانين وسياسين..رايحين فين  
وجايين منين..اصل الجريدة من الجرايد الصفراء..اللي دائما تعمل  
عفرة..حوالين المهمين..لما صور مسئول سمين بينقط رقاصة في  
كباريه..والف سلام لسعادة البيه..اللي بقى من نواب  
النقوط..واتكرش من تحت القبة.

وكل ما الزمن يمر تتغير صورة مصر مية وتمانين درجة..والناس  
بقسرة قادر يترفعوا هما كمان متين درجة..ويبقى لهم أماكنهم  
الخاصة..يتقابلوا فيها مع بعضهم وتزيد ثروة أهاليهم.

و"صبر الزمان" كان نفسه يخش الأماكن ديا..فنادق سبع  
نجوم..وماحدث يقدر حوالها يحوم..اماكن سرية..والأمن حوالها  
كام سرية..وولاد الجنية ما يخلوش حد يدخل إلا لما يتأكدوا من  
شخصيته ويشوفوا هويته..ويدخل الزبون منهم..إما بفلوسه  
ويكون ملياردير..وما ينفعش يخش مليونير..اصله في نظرهم من  
الطبقة العامة..لأصحاب المالية والهمة أو شخصية مهمة..فنان  
كبير..أو وزير..السر جوه في بير..حمامات ساونة وكوافيرات  
حريمي ورجالي ووسائل تظبط تخلي الرفيع تخين والتخين  
رفيع..والعجوز شباب وما يخلش الأمر من شرب الهباب..ولا  
يمكن حد يقدر يهرش الزباين..والغاوي لعب قمار..جمع فلوسه من  
بامبرز عامله للحمار عشان عدم تلوث البيئة..عيونهم  
جريئة..يندب فيها ميت رصاصة..وحارساهم عيون  
البصاصة..عيونهم زي اليوم وماسكين في ايديهم شوم..وماحدث  
يقدر يهوب ناحيتهم..ويخسروا ألوفا من ماليتهم..وعلى قلبهم  
زي العسل..ما هم حيعوضوه من دم الغلابة.

وقف قدام الفندق من بعيد..وصور صورة للمبنى من بره وكأنه

فتح الجرة وراح على رئيس التحرير وقاله على السر  
الخطير.. حذرته انه يقرب من الأماكن ديا.. وإلا حتبقى مصيبة  
قوية.. وإحنا يا "صبر الزمان".. جريدة صفرا وبتشفى في مصائب  
المهمين.. لكن ما نقدرش نبقي مساجين.. دول سناهم  
حامية.. يقطعوا لحمنا ويطبخوا عليه بامية.. ما هم قادرين وباعوا  
لحم الحمير للشعب اللي اتجرع السم في مواجير.  
لكن "صبر الزمان" ركب دماغه.. وشتر ذراعه.. وراح اجر كاميرا  
صغيرة ما حدش يلاحظها ويبدأ يصور الأماكن ديا بتفاصيلها.. بس  
حيخش ازاي.. حاول يدخل زي أي زبون.. وماله كله يهون عشان  
المهنة.. ودخل الريسبشن.. كل العيون عليه واتنين من الأمن اتلفوا  
حواليه.. وقال للموظف وهو بيتدلجلج.. أنا عاوز احجز  
اوضة.. الموظف قاله.. عندنا أجنحة.. منها اللي بيتأجر ساعات ما  
تزيدش عن عشرة.. ودي ايجارها خمسميت دولار.. أما البيات الليلة  
بألفين دولار.. شاملة الأكل والشرب والمزة كفيار.  
لون وشه اتغير وحس انه على نفسه حيتسير.. وقال  
متشكرين.. اصل أنا كنت عاوز احجز لعروسة وعريس.. اشورهم

واجيلكم..وراح عامل مارشدير..ولقى واحد ميلياردير..دخل  
ومعاه الحرس بتوعه..ماسكين بنادق رشاس..وحصل ربكة ودبكة  
عشان يستقبلوه..في الزحمة جرى جوة الفندق واستخى..لقى ورا  
الميلياردير..كام وزير وجروا عليه وسلموا عليه وكان فاضل شوية  
ويوسوا ايديه..قال يا ولاد الايه..فاردين نفسكم علينا وتتكلّموا  
من تحت ضرّوسكم ويا ويله اللي يكون له مصلحة عندكم..تخطوه  
تحت رجلكم.

وابتدا يتجول في الفندق من غير ما حد يحس بيه..وهات يا صور  
بالكاميرا الصغيرة الخفية..تصور كل الحاجات المستخية..وكل ما  
يصور صورة..يقول معقولة..المكان ده في مصر..بلد الاشتراكية  
بتاعت زمان..إيه اللي جرا لبلدنا يا "صبر الزمان"..ولاحظ إن  
المكان مليان باخوانا العرب من جميع البلاد..شرقها  
وغربها..والكاميرا عمالة تصور..وما كانش برضه يتصور انه يلاقي  
المستول..اللي بيظهر في التلفزيون وكله وقار..نازل في أكل سمك  
وقار..ودنيس وبوري..أحجامه تبهر العقول..اسماك عمرها ما  
اتعرضت في الأسواق..وجبري شابه أكبر من شباب كبير

الرحية..وبعدها اخذ كاس وراح في دنيا ثانية..وجت سنيورة  
شكلها من ولاد الناس الهاي..مش زي اللي كان بيشفهم في  
كباريهات أفلام زمان..نسوان توزن أطنان..والسنيورة يادوب  
وزننا خمسين كيلو بالكثير..وحاطة ريحة تصحي الأبدان بعد  
المات..ويطلع ميات ويحطها في صدرها..قال يا ابن الهرمة..فلوس  
الشعب الكادح الغلبان ماهاش عندك أي اتمان..وتحطها بين  
الرمان.

وخذ صورة وجرى على رئيس التحرير..شافها شهق..وكان  
جردل ميه على دماغه اندلق..وقاله..مرفوض..مرفوض يا "صبر  
الزمان"..قلت لك قبل كده إن إحنا جرنان اصفر..لكن أنا ما  
انساش العنبر..اللي كنت نزيل فيه في سجن اراميدان..ياللا  
هويننا..عاوز على فين تودينا..ورفده من الجرنان..وخذ ديله في  
سنانه وعلى جرنان تاني..فيه صحفية اسمها "تهاني"..كانت زميلته في  
الكلية وعرض عليها الصور..خطفتها من ايده وجرت على رئيس  
التحرير..قال اهو إحنا عاوزين ده الوزير وأشكاله من أصحاب  
المليارات اللي اخروا بلدنا ميات السنين..انت صحفي



أمين..وهاينك في جرناني..ده مش اصفر بس..ده عامق كمان.



### شجرة العيلة

"صبر الزمان"..شغال موظف في دار الخفوظات بالقلعة..تلال من الورق..ألف ومية..مرمية..في مخزن كبير..زي البير..واللي عاوز معلومة عن حاجة قديمة..عيلة..شيلة..حرب..ضرب يروح هناك..والسيد عياش عطا عطا الله عبد الموجود الواطي..راح له..وقاله..عاوز اعرف شجرة عيلة الواطي..دفع الرسوم ودفعله المعلوم..واتغرز "صبر الزمان" في دفاتر وأوراق..من القرن الحالي واللي فات..واللي لسة عايش واللي مات..وجاله واحد تاني..معاه ورقة مكتوب فيها اسم طويل..سداسي..عباس نقراشي حواش مسعود عبد الموجود الواطي..وقاله أنت كمان..عاوزين نسأل عن ناس من زمان..بقم رفات..انتم قرايب ولا أخوات..والاثنين بصوا لبعضهم..وقالوا معقول إحنا من عيلة واحدة..يعني جدنا الواطي؟!..واتحايلوا على "صبر الزمان" يشوف اصل

الحكاية.. أصلهم متعقدين من اسم جدهم.. لأنهم تجار.. والاسم  
مسبب لهم العار.. ونسايهم.. بتعايرهم.. عشان جدهم اصله  
واطى.. مع إن العيلة كلها تعرف.. إن جدهم عنده خمسميت  
فدان.. كان زارعهم بتتجان قبل حرب الطليان.  
وقعد "صبر الزمان" يقلب في أوراق ودفاتر.. لخد ما وصل للجد  
الاولاني واسمه "عطا الله".. والثاني واسمه "عبد الموجود".. ولقبهم  
"العالي".. الاتنين فرحوا لما اتأكدوا من تواريخ الميلاد.. والبلاد اللي  
اتوفوا فيها الجدد والاولاد والأحفاد.. في بلد اسمها ميت  
حداد.. لكن "صبر الزمان" بيقلب في الورق لقي ورقة مكتوب فيها  
اسم شهرته.. الواطى.. بلموا.. وكانوا حيمشوا من غير ما  
يسلموا.. لكن "صبر الزمان" قاهم.. إن فيه واحد من عيلتهم.. اسمه  
"جباب الله" وخد الله عزيز عبد الموجود العالي" وشهرته  
"الواطى".. الرجال ده كان ساكن في حارة السد.. وأكد  
قريبكم.. عشان انتم الثلاثة بيجمعكم في الآخر اسم "عبد الموجود  
العالي" وشهرته "الواطى".. يعني احتمال "عزيز عبد الموجود العالي"  
و"عطا الله عبد الموجود العالي".. أخوات.

خـدوا بسرعة عنوان "جاب الله" وطاروا على حارة السد.. لقم  
بيتهم اقد.. و"جاب الله" كمان.. و"خد الله" برضه ربنا خده  
واتكل على الله.. لكن الجيران أكدوا أن جدهم عايش واسمه "عزيز  
الواطي".. وعاش وعنده اكتوبر من مئة وعشرين سنة.. ولسة  
بصحته.. لكن نظره راح لما حزن على ابنه "خد الله" وحفيده  
"جاب الله".

وقابلوا واحد عجوز من الجيران.. اسمه "خليفة الجيران".. دلهم على  
بيت "عزيز الواطي".. في درب الوطواط.. وخدوا دليلهم في  
سناهم.. وعدل على العنوان.. لاقوه قاعد في الجرين وبيهرش زي  
الجربان.. أول ما شافهم على قد نظره.. قال انتم مين.. قالوا له إحنا  
من عيلة الواطي.. ضحك وقاهم باين من ربحكم.. حاكم العيلة دي  
كلها فيها ريحة في جلدهم.. أساسها من تحت عضمهم.. أنا  
هرشتكم.. عاوزين إيه بقى مني.. قالوا له عاوزين نعرف أساس اسم  
عيلتنا.. ازاي يبقى عالي مرة وواطي مرة.. ده إحنا عيلتنا  
مرة.. ضحك وقاهم عاوزين تتأكدوا من أصلكم وفصلكم.. حاكم  
مصر مليانة اسامي بالبالا ولازقة في أهاليهم.. ساعات تغمهم

وساعات تسرههم..لما يكون الاسم "الخلوف" يتداروا منه..ولما يكون الاسم السعيد أو المسعود..يتشعبطوا فيه..ولما تيجي تدور "الخلوف"..كان معاه في زمن السحتوت أوف..المسعود والسعيد كانوا بيعاين خردة وحديد..وحالهم طين ورزقهم محدود..شوف الدنيا واساميهها..قالوا له إحنا جدنا..اللي هو جدك كان عالي ولا واطي..ضحك وقال كان عالي وباب بيته واطي..عشان كده طلع عليه لقب الواطي..وأنا بقى عدت من السنين مية وتلاتين..واسمي جاي في الموسوعة العالمية من المعمرين..مع أي من الفقراين..العيلة زي نسلها كثير..اكثر من متين حفيد للواطى..اللي هو في الأصل عالي..و"عبد الموجود الواطى"..اكبر الجدود..اللي وقفت عنده الحدود..لما كانوا بيقيدوا المواليد..أيام العثمانلية..وكان فيه باشا الباني ومراته تركية..عنده خمسين فدان وهي عندها خمسة..وجدكم "عبد الموجود" كان شغال كاتب الدائرة..كان متعلم في زمن كان المتعلمين يتعدوا على الصوايع في القطر المصري كله..ولما الباشا طلقها تلت مرات..طلبوا من جدكم الكبير "عبد

الموجود" يصلح الحدود.. ويتجاوزها ليلة واحدة ويبقى محلل.. لكنه خلل.. وشبط في الجواز بعد البرنسية التركية ما اتشعبت فيه حاكم كان عتويل وشارب من مية النيل.. ولما ماتت ورثها.. وبقي في العاللي.. لكن اسمه "الواطي" لرق فيه.. وخلف من التركية ولد وبنية.. فريد وفوزية.. وطبعاً "فريد" لا هو جدك ولا جد اللي معاك.. وسأل واحد منهم قالة.. جدك اسمه إيه؟.. قال "عطا الله".. قال يبقى حفيد "إحسان أم ودان".. الزوجة رقم اثنين.. بعد التركية.. وسأل الثاني.. قالة جدي "مسعود".. قالة يبقى أنت حفيد "عهود" رقم ثلاثة.. وأنا بقى "عزيز" ابن "عزيزة" الزوجة رقم أربعة.. الاثنين قالوا في نفس واحد.. يعني أنت مش من التركية الغنية.. قاهم لأ وجدانكم وأنا ولاد الخدامين.. اللي كانوا في قصر الجدد الكبير "عبد الموجود".. اللي طلّع فعلاً واطي.. لما بص للخدامين.. بعد ما كان متجاوز ست الحريم التركية.. اللي لا أنا ولا انتم من بطنها.. قالوا يا دي المصيبة.. إذا كان الجدد غني.. لكن طلّعنا ولاد الخدامين.. يا شجرة العيلة كنا فاكرينك ضليلة.. لكن الأصول من ناحية الحريم نيلة.. عشان كده سحنتنا كلنا متلخطة

ومتشخطة..ضحك وكركع من قلبه..وقالهم وياما شجر العائلات  
مخبي تاريخ وأصول وفروع..عيلة السبع وعيلة الكلب..عيلة  
العصفور وعيلة الغراب..وعيلة الواطي..يا واطين وراح ميت بين  
ايديهم..بعد ما رساهم على بر..وراح واخذ الشر..وسبحان في  
حكمته يوصلوله عشان يحضروا دفنته..بعد الدنيا ما  
نسيته..والاتنين اثبتوا انهم ولاد أصول ومش واطين..وكويس إن  
الراجل مات والسر معاه..وكل واحد بعد الدفنة يرجع يجر جر  
قفاه..ويعيش حياته..مش مهم من العاليين أو الواطين..ما دام  
آخرها ميتين.



### سميط وبيض وجبنة

"صبر الزمان"..كل فترة يقلب في دفاتر زمان..يلاقي حاجات كتير  
اندثرت..وحاجات تانية اتقلعت..لما يروح "لأم نوح" يشتري  
ويلاقيها خلصت..كانت بتبيع بسطا ما فيش زها..شكلها  
وطعمها..وحلاوة زمان خاتم وعقد وحلق وسبت..وبياعها "عثمان

التبت". وكله كوم.. لما يقوم من النوم.. يسمع بيع السميط "عم  
علي الاليت" .. بجلايته النضيفة.. والسميط بتعريفه.. ومعاها شوية  
دقة.. ومد ايدك يا حدوقة.

وياخد من أمه تعريفه.. ويشترى سميطه صنعة الحريفة.. مشبكة زي  
الشبابيك وفي طعمها ملهاش شريك.. زي الفريك.

ولما كبر شوية وخطب مراته "هنية" .. والفسحة على القدر.. كورنيش  
النيل ساعة الأصل.. وبيع الحلبسة والحاجة السقانة بتلاتة  
تعريفه.. ويعدي بتاع السميط.. وينادي عليه.. والريق يجري  
عليها.. اجيب سميطين ويضتين وكمان حيتين جنة رومي.. ويا  
معدة او عي تنامي وقومي على السميط حتتك بتك وخطيته تبص  
له وتضحك.. والسميطه تصيرة للشيعان.. واكله سمينة للجعان..

ويعدي الزمان وتظهر أشكال وألوان من الحاجات اللي تسر  
البطون وكله يهون اللي الشيس.. يتزل المعدة زي الجبس وهات يا  
بابا خمسة جنيه.. لواحد شاورمة وهامبرجر تيك او اي.. خوازيق

طمان باي..وتكثر الأمراض من غير ما تظهر أعراض..ونخش في  
أشعة مقطعية وتحليل..وتظهر في الصورة بقاليل..ويقولوا فيروس  
جديد مالوش علاج..ويحصل للأهالي انزعاج.

ويقول الله يرحمك يا أمي..كنتي دائماً بتخافي من السميط عشان  
بيتباع مكشوف واهو دلوقتي بنشوف الحاجات متغطية..ونحسن  
النية وما نعرفش إيه الأسرار المستخية وسمنتها..أو نوع  
لحمتها..المهم إن ريمتها بتشد العيال والكل عليها شغال لحد ما  
يجي المرض البطال.

مع السلامة يا زمن السميط يا أكل الحبيبة على الكورنيش ياللي  
زيك ما فيش..ليه بتروح وما بتجيش زمن زي اللي فيه  
بنعيش..فيه القراقيش صنعة ايسد أمي..اللي كانت شائلة  
هي..ومراتي شغالة موظفة..بيضة ومتختخة وبتيجي من الشغل  
بعد العشا..ويتحول الغدا لعشا والجودة بالموجودة..يا "صبر  
الزمان"..تونة وسلامون وجبنة رومي وجودة..وتروح نفسه  
للسميط ما دام الأكل كله اورديجي ويزرجن ويقولها قومي من  
ريجي..ويفضل يزعق ويقول سميط وبيض وجبنة وشوية دقة يا واد



يا حدوقة.. وكل واحد يعجبه زمانه ويعيب زمن غيره.



## مصريا سميراني

"صبر الزمان" .. حيران وتايه .. عاوز يوصل لأساس مصر .. امق بدأت ومين عايش فيها .. جوة أراضيها .. وعمل رحلته عبر الزمان .. وكان .. مدهوش .. مرووش .. من أشكال المصريين .. أجسام واللوان .. طوال .. عراض .. سمان .. نحاف .. احمر .. ابيض .. اصفر .. اسود .. حمري .. اللوان بشرتهم .. سحتهم .. ولازم تقول ده مصري .. رغم كل الاختلافات .. الائتلاف من عادات وتقاليد واحدة .. لغة واحدة .. يعني فيه وحدة .. أساسها الجنس الحامي القوقازي ..

والعكس موجود في بلاد من أول الوجود .. الصين واليابان واللي حوالهم من بلاد .. شكل واحد .. ولون واحد .. ما فيش تعدد .. ونخش على الهند وبلاد السند .. كلهم شبه واحد .. ونطلع لفوق شوية على البلاد الروسية والتركية .. ونخش البحر الأبيض لأوربا .. نلاقيهم كلهم برونه شبه واحد .. البياض لبشرتهم والعيون

الملونة في وشوشهم.

ونعمل جولة في دول الخليج والسعودية..نلاقي العروبة موحدة  
اشكالهم مع إن فيه أجناس دخلت بنيانهم..وليبيا وأفريقيا شملها  
وجنوبها..السحنة بالتقريب واحدة.

ونستقي سوريا ولبنان..جامعين من العرب صفات..ومن أوروبا  
هيئات وأشكال..ونقول مش إشكال..ما هو العالم كله داخل في  
بعضه من زمان..تجارة وسفر..حروب وغزوات..

أما مصر اللي قمه وبيحث في أساس شعبها..من موميات تعدي  
الآلاف من السنين..عرف إن مصر عمرها اكر من اتناشر ألف  
سنة..بدايتها لبيين وأثيوبيين لحد ما اتكونت الأسرات  
الفرعونية..واتركز لون البشرة على الأسمر..والوش  
طويل..والجسم مرسوم بالمعضلات..وتيجي اللخبطة  
والمعضلات..ويجي لمصر البطالة..وبعدها الرومان  
والفرس..وانصهار في المصريين..وابتدت تظهر بشرات بيضا وحمرا  
والعيون ملونة..وناس تيجي من آسيا تبقى البشرة صفرا والعيون  
ضيقة..واللون الأسمر يفضل في أماكن ويتحول للون الحمري

والقمحي في أماكن.. ويحيي العرب والإسلام.. ومغاربة مع المعز لدين  
الله.. وإخشيده وطولونيين وأيوبيين.. وبعدها ممالك من آسيا  
وأوروبا.. جند ومرتقة.. وبعده أترك.. ويحتفلوا بالمصريين.. وتيجي  
تجس للوجوه في القرن العشرين بقت متشكلة.. والأسرة دي  
اصلها أترك.. ودي اصلها ارمي.. ودي اصلها أشرف من عرب  
الجزيرة.. أشكال وألوان كثيرة.. والأسرة دي خليط بين اليونانيين  
والمصريين.. في إسكندرية بالذات.. منهم فقرا ومنهم ولاد  
ذوات.. الأب "جاسر" والأم "تريزة".. وتريزة لأبوه عيوشة.. ولأمه  
فريشتورا.. ووجه بحري.. عيون خضرا وزرقا.. وتلاقيها برضه في  
الصعيد في أسبوط ولسانهم كلهم مربوط.. على لكنة واحدة تميز  
المصريين عن العرب أجمعين وخفة دم في نكتة.. والواد "شحتة"  
يقسم إن جده الكبير كان طلياني.. أبوه "ورداني" وجده "فيتسو"  
كان يشغل ماكينة السينما الترسو في بداية القرن العشرين.. وكان  
مسلم وموحد بالله.. وأمه اسمها "ما شاء الله".

والعادات والتقاليد واحدة لكل اللي عايشين على  
أراضيها.. مصريين وأجانب.. زاروها وحبوها واتجوزوا منها وعاشوا

فيها..وفي الأقصر تلاقي منهم كثير..خصوصاً سواقين الفلايك  
والحناطير..الأب "مخيمر" والأم "مارجريت"..وعايشة معاه في  
بيت..لامم العيلة كلها..وولادها شكلين..ابيض محمر  
واسمر..وأوعى تقر..بقت بتخاف على ولادها من الحسد..وتنادي  
حماها عشان يدوق الفطير المشلتت اللي عملته في فرن البيت  
وتقول يا ريت كنت اتولدت واتربت في بلاد الفراعين..وترطن  
لغة الصعايدة احسن من البت "عايدة"..وتقول كيف وورايح وين  
وحش وزين.

ومصريين سافروا برة عشان يتعلموا في القرن التسعاشر..سافروا  
سبعة..ورجعوا اربعتاشر..والدكتور "مباشر" جاب معاه من  
المانيا..و"سعيد" ابن المنيا جاب معاه من فرنسا..والتالت جاب من  
قلورنسا..ويقم أزواج..والخلفة برضه أشكال وألوان..شعور صفرا  
وكستائي..وعيون خضرا..والبت عصيبة زي أمها والواد زي ابوه  
هوائي.

وتفضل مصر فاتحة ذراعها للحبايب..أغراب أو قرايب وهواها  
يرد الروح وريحة وزهرها ينفوح..من بورسعيد لأسوان ومطروح..

ومطرح ما تروح تلاقىهم طيين.. دابو في بعضهم ويعتروا  
باراضيههم.. ولو غضبوا.. بسرعة تراضيههم.  
ورجع "صبر الزمان" من رحلته وقاله أنا ما عنتش متحير.. مادام  
الدم عمره ما يتغير.. عشان بتجري فيه مية النيل.. والعمر الطويل  
لعم عبد الجليل اللي بيع حلاوة شامية ويقول جدي من  
الشام.. وجدتي من فلسطين.. وأبوي مصري اتجوز بنتهم  
سرين.. وكلنا بشر من طين.. وبطاتي مصري.. وباعتز بجذوري  
وفروعي وجدي الكبير من الأتراك ولقب العيلة "أغا".. وبنتي "مها"  
شعرها اصفر وعيونها سودا.. وبعودة يا مصر بعودة.



### صحتك بالرنيا.. والرنيا فانية

"صبر الزمان".. يقلب في كتاب حكم وأمثال للبشر على مستوى  
الكرة الأرضية.. فيها النصائح اللي هي.. مقدمات مظلومة.. تؤدي  
لنتائج عمرها ما تكون مغلوبة.. والبشكير غير الفوطة.. والقوطة

فيها فائدة وفيتامينات بس مش لكل المعدات.. وحاجات وحاجات  
كلها ضد بعضها.. تدور عليها تلاقيها طلعت برة خط المقدمات  
والنتائج تبقى غير مرضية.. لكل الناس على وجه الكرة الأرضية.  
وكانت أمه تقوله.. اشرب اللبن الصباحية.. يخلي صحتك اللي  
هيا.. يقوها.. آمال الفقير اللي مش لاقى حق اللبن.. حتى يبقى صحته  
إيه؟.. منيلة.. وذنبيه إيه؟!

و"صبر الزمان" كل ما ياخذ باله من صحته.. في أكلته وشربته  
وقعدته ومشيته.. يلاقي ناس ضارباها طبنجة وتجيله حساسية من  
المانجا.. ويعلي صوته ويقول.. عيشني النهاردة وموتني بكرة.. إحنا في  
الحياة ذكرى.. وما يصيبك إلا المكتوب لك يا أبو بشرى.

يا "صبر الزمان".. أنا ما عدش عندي سنان.. إيه يعني اللي  
حصل.. حار كب طقم لا يخشله سوس ولا يحتاج معجون.. والأهلي  
لما يجيب جون.. اشرب خمس فناجين قهوة في ديل بعضهم.. دلوقتي  
ما اقدرش اشرب فنجان واحد.. حتىقولي الصحة راحت.. أقولك يا  
"صبر الزمان".. أنا ما عنتش باقى فرحان.. وأوعى تفتكر اني

فرحان..كنت باكل في العيد تلت خرفان..دلوقي لو أكلت حنة  
واحدة ضاني يجيلي حرقان..واهو أنا عشت يومي..واتمتعت  
ونسيت همومي..وجه بكرة اللي ما كنتش عامل حسابي عليه.  
"صبر الزمان" بص لصاحبه وبلم..وقاله يعني كله زي كله..واللي  
عاش معتل زي اللي مات بصحته..ضحك صاحبه وقال..يا عم  
العيال الغلابة ماشية عريانة..وفي الزبالة غرقانة..ومستورة  
معاهم..والعيال اللي متربين على الغالي والشيس احسن  
تسالي..ياكلوا منها كل يوم عشر أكياس..والمعدة تشتكي ويطلع  
عندهم أميبيا وأكياس..يا عم صبر الزمان..طول ما فيه صحة  
بنديها..ولما تروح ما نطغطش عليها..وما فيش حد يقدر يقول انه  
بيدخر صحة للزمن..عشان الزمن بياكل في جسم الإنسان لما يزيد  
ميت عام ولا عام..أنا شايف أني كده آخر تمام..وساعة الحظ ما  
تعوضش..ما تخافش على نفسك أوي بالشكل ده..ده الراجل  
بتبقى صحته زي البمب..وياكل أكلة كرنب..تطبق على معدته  
ويطب.

"صبر الزمان" قاله..يعني انت شايف كده يا صاحبي..قاله

أكيد..وان كنت فاكّر نفسك إن صحتك حديد..تعالى معايا لمعمل  
تحليل..وحيطلع عندك ألف مرض وماهمش عرض.."صبر الزمان"  
خاف من كلامه وقال معقول اللي اتعلم زي اللي ما كملش  
علامه..وقبل ما يكمل كلامه..جه الخبر عن طريق  
إعلامه..الحكومة أعلنت إن البلد دخلها انفلونزا الطيور..حاجة  
عمرنا ما سمعنا عليها..قال لا يا حبيبي..دي جت مرة في سنة  
١٩١٨..بس كان اسمها طاعون الفراخ..اللي يشرب شوربتها  
يلاقي نفسها داخ..وفي دقائق يكون راح..ولا كان فيه مستشفيات  
ولا تطعيم..واللي ماتوا وقتها يعدوا الثلاثين مليون من أهل  
الكون.

قال "صبر الزمان"..يعني الزمان بيعيد نفسه..للمرض اللي اتغير  
اسمه..من طاعون الفراخ لانفلونزا..ويصيب كمان البطة  
والوزة..والحماسة والكتكوت..والناس خافت لتموت..نزلوا حرق  
ودبح في الفراخ..وتليفونات حكومية ما بتردش..وقالوا مدافن  
رسمية..من الجير الحسي..يترمي فيها اللي مات واللي لسة  
حي..والناس دورت عليها مالتتهاش..رمت الفراخ في الترع



والمصارف..والكل بقى خايف..وقالوا المية اتسمت..طلع  
المسئول وقال دي إشاعات..**"صبر الزمان"** قال يعني انتم قلتم قبل  
كده كلام صادق..عشان نصدق كلامكم؟!..والدنيا قعدت تخطط  
في بعضها..وصاحب **"صبر الزمان"** ماهموش وقال المكتوب على  
الجبين لازم تشوقه العين..ومش مهم تهد العشة..وأهي قشة بتتقد  
الفرقان..الكفران من عيشته..ولما يفكر نينته لما كانت بتحكي له  
حدوتة الفرخة مرخة..والديك كيك..والوزة ازة..والبطة  
بطة..ووقعي الناس في ورطة يا حكومة الأزمات.

وبعد ما سادت الآمال بالأمان..ماتت الست **"أمال"** عشان تبقى  
أول حالة بشرية ويرجع الرعب ينتشر..والنجاة من رب  
البرية..حاكم الغلبان ماهيته يا دوب تقدر على الفراخ..ويرجع  
يقول تحافظ على صحتك أو تهمل فيها..ما هينوبك إلا نصيبك  
والمقدر مكتوب وعمر الحذر ما يمنع قدر.



## أشقي جنب المحيط تكسب البيت والغيط

"صبر الزمان" مبهور بالحرية في بلاد برانية..الواحد يشتم في أنخن  
تخين..سوا كان من حزب اليسار ولا اليمين..معتزلين ولا  
متطرفين..وقال امق بلدنا الجوانية يبقى فيها حرية والواحد يخرج  
كل اللي جواه في المسئولين اللي زي الحواة..يلعبوا بالبيضة  
والحجر ويقولوا إنجازنا وصل للقمر..قنوات فضائية وكأنهم جابوا  
لنفسهم الحيلة القوية لما القنوات المستقلة كشفت لعبة  
الشلة..وانكسرت القلة ورا واحد واتنين فيهم..بما فيهم راسهم  
الكبيرة وانتظرناهم يحاكموهم بعد ما الناس لعنت سلسفين  
أبوهم..لكن كل واحد منهم اتشعبط في وظيفة كبيرة من  
الشركات الاستثمارية الحقيرة اللي يتنحر في الناس الفقيرة.  
ولما الحريات في بلدنا زادت والأحزاب ظهرت وبانت..وكل يوم  
والستاني يظهر حزب وابتدت الحرب بين الأحزاب وبعضها وكل  
القطط الفطسانة تتطلع فيها..وتضرب بالروسية في كل الرموز

الوطنية..واللسان خرج برة الخلق..وطال كل الخلق من الوزير  
للعسكري والففير..وابتدوا ينطحوا في الكبير.  
قال أنا مالي خليفي ماشي جنب الحيط..وبعد كده سمع عن  
حركات..غير الأحزاب ضربت برجيلها الباب وخذت كل حاجة  
في وشها وما حدش يقدر يهشها ولا يقف قدام زحفها.  
ريقه جرى وقال مرة أكون جرى..واخش جوة الحريق وامشي في  
نفس الطريق وكفاية أي طول عمري غريق في سكوتي ويا مصر  
عمرك ما حتموتي طول ما فيه لسان ينطق بالحق.  
وانضم للجماعة اللي بتحامي عن الجواعي والعطلانين..اللي مش  
لاقين وظيفة بعد ما اتلغى التعمين ويقولوا بقينا كحيانين من حرمان  
طول السنين اللي تعدي العشرين..إحنا محتجين على تصرفات  
المسئولين من كبيرهم لصغيرهم..ومشوا في مظاهرات ومبادئهم  
على كتافهم يمكن الزمن يرحمهم.  
واتعرف على شاب وديع اسمع "عبد البديع"..الفقر جايه من  
الدماغ لحد الكلاسيك..واد سريع..يطير زي الصاروخ لما يلاقي  
الشمروخ حيزل على دماغه ويجيب داغه وبقت بينهم علاقة

حميمة..وحكى له عن أسرته الحالية والقديمة من عيلة كلها  
وطنية..استشهدوا في مواقع عسكرية..من حرب عراي لسعد  
زغلول واعترض على تصرفات السلطان هلول اللي بتحيطه  
الغلول من هراوات وبشاوات استحلوا أراضي الفلاحين وفي كل  
زمن وحين يكون في العيلة شهيد..جده "عبد الحميد" اللي راح في  
حرب عراي..وابن جده "شرابي"..أبو جده "عناي" راح في ثورة  
تسعتاشر وأخوه "شلقاني مات يوم اتناشر في الأربعينات لما دمروا  
واحد من الكمبات بتاعة الإنجليز..ويا عزيز يا عزيز كبة تاخذ  
الإنجليز.

أما أبوه..سليل الجدود اللي عدوا الحدود في تاريخ الكفاح  
والوطنية..لما اتجوز أمه "هنية"..حلفت عليه ما يدخل نفسه في  
السياسة ويبقى في منتهى الكياسة ويخليه في حاله ويربي عياله اللي  
أنا واحد منهم..وأنا الوحيد اللي خلعت منهم..وكلهم ماشين  
جنب الحيط..وأمي ما تعرفش أني بقيت من المعارضين الوطنيين.  
والمشكلة في جدته الكبيرة "إحسان"..مش أم أبويا..لكن أم جدي  
والوقت يعيش عليها ما يهدي وعمرها ما بيعدي..عندها من

السنين مية واتين..ومعلقة صور كفاح العيلة على مدى  
السنين..ودائماً زعلانة من أمه..عشان ولادها ما استمروش في  
الكفاح..ناسية إن زمن الإنجليز والملكية راح..لكن الجدة دائماً  
تسمع صوت مظاهرات..تقولها الأم دي هيئات.

والمظاهرات كانت في كل الأوقات..والأم تعرف بس  
التظاهرات..ناس مش راضية عن الحال..وهي تقول عال  
العال..كفاية إن إحنا بقينا أحرار..ومحكومين من ولاد بلدنا..سوا  
كانوا طيبين أو رضىين..المهم ولادها يبعدوا عن المظاهرات  
والمظاهرات..وقناعتها إنها لا تودي ولا تجيب..وعمرها ما حتصيب  
ما دام الزمان ماشي وكل واحد من ولادها جنب الحيط ماشي وما  
تعرفش حاجة عن ابنها اللي خد قرار وقرب نفسه من النار في زمن  
اسمه حريات لكن هيهات الموجود يتغير وكل واحد من حقه  
يتصور..الزمن اللي جاي حيكون شكله إيه ومش مهم مين الحق له  
أو عليه.

"صبر الزمان"..اتأثر بكلام "أم عبد البديع"..وقعد يراجع زمن  
الآراء المعارضة..لقى إنها أصوات فارغة ومش مسموعة..ولولا إن

رجال الثورة كانوا مجموعة.. في ايديها القوة والسلطة.. لكنت  
العملية بقت سلطة.. واتأكد إن صوته هو وغيره حيقى في  
الموا.. مادام الشعب وعيه محدود ويهمه استمرار الموجود.. لأن  
المصلحة في ايده.. وهو اللي يحدد مصر عييده.. ومادام اغلب  
الناس راضية بالعيشة حتى لو أكلوا لقمة حاف وانفطوا  
بخيشة.. رجع في كلامه وقال خليني ماشي جنب الحيط مع أني ما  
املكش غيط ولا بيت.



### بير مسعود والتعيس مسعود

"صبر الزمان".. سمع عن بير مسعود.. ويقول.. معقول.. لسه فيه  
عقول بتصدق.. وحاول يتحقق وقال ده بير عمقه من اتنين لثلاثة  
متر.. واتكتب عنه مليون سطر.. يحقق الأمانى لهدى وقمانى بعمله  
معدنية تترمى في المية.. والبركة في المية تتحقق الأمنية.  
هناك في إسكندرية المارية.. بير وسط المية.. اتحككت عنه حكايات  
واتنسجت عنه روايات وكلها من الستات في بلد زنقة الستات..

وقالوا إن "مسعود" كان شيخ طيب واتدفن هناك..أو ولد صغير  
انتحر جواه من اللي مرات أبوه عملته فيه..ويخلو الكلام لما يقولوا  
إن "مسعود" عمره ما كان سعيد مسعود..كان تاجر للمخدرات  
لما تجاوز الخطرات..كانت نهايته عند البير ومات معاه سره  
الخطر.

يا بنات إسكندرية..مشيكم على البحر غية..وعشان تتحقق  
الأمنية..وتقرب "أماني" من "سعداني"..ويضمهم عش  
الزوجة..لازم ترمي في المية عملة معدنية..توشوها  
وتلاغيها..وتطلع سرها من قلبها والعملة تجاريها وترميها..وتروح  
على بيتها وتنام على فرشتها وأكد حتحقق أمنيته.

و"أبو محمود" راح زار العمود وجاله هاتف وهو واقف..يقرا  
الفاتحة على الأموات..حتحقق كل الأمنيات لو رocht بير  
"مسعود" ورميت شوية نقود..حيشفي ابنك آخر العنقود..بس  
أوعى تنسى توشوش الفلوس لحسن تبقى متعوس..والراجل راح  
ورمى الفلوس وريح النفوس لكن رجع البيت لقي الولد مات!!

وعشان الناس دائماً في عناد والرضا محدود.. لكن تلاقيه موجود  
وعند الولد "عبد الموجود" .. ولد عاطل من طابور العاطلين.. كان  
مسرة مع الموجودين.. يرموا فلوس في البير.. وهو كمان رمى ربع  
جنيه فضة من مصروفه اللي عمره ما قضا.. ودعا انه يلاقي عمل  
وعنده الأمل بركات الشيخ "مسعود" بالفائدة عليه تعود.  
وعدى عليه أسبوع وهو موجوع وساعات يحس بالجوع لكن أبوه  
وظيفته محدودة ويدوب بالجودة يأكلهم في اليوم طقتين.. يفطروا  
ويتغدوا.. وبالليل من غير عشا يتمددوا وعشاننا عليك يا رب.  
وشهر يجر شهر وأمنيته لم تستجاب.. وكل شوية يفض الجراب.. قام  
فتح الباب وجرى على بير "مسعود" ..لقى الحريم كثير وشوشتهم  
للسير كأنها فوازير.. نزل تحت البير واستخى ومد ايده وعى.. لحد  
ما جيبوه اتملت بالفلوس.. ضحك وقال سرك مفقوس يا شيخ  
"مسعود" ..المثل يقول "لو كانت تعود خطوا في القلة عود" ..ولازم  
أعود.

رجع بيتهم نشف الفلوس من المية..لقى النقدية تعدى الخمسين  
جنيه.. والله وبقيت بيه وصحابه مش حيعبوا عليه لأنهم بيصرفوا



عليه.

والعملية كبرت في دماغه وخف صداعه ولبس جلاية شيخ  
مستهلهة وسمى نفسه "أبو العلا". حفيد الشيخ "مسعود" صاحب  
السيرة..وسره باتع وخطر..وراح ناحية البر وقعد على صخرة  
وكلامه كلام سحرة..وقعد يقول..يا بنت إسكندرية يا شاكية من  
الوجيعة الجوانية..وشوشي الفلوس واحسني النية وارمي  
النقدية..وكل ما ترمي اكثر..الشيخ مش حيستكثر انه يحقق  
امانيكي.

والحریم اتجمعوا حواليه وحاولوا يدوله فلوس..وشه بقى عبوس  
وزعل منهم وكشر في وشهم وقاهم..أنا ما املكش غير الدعا..انه  
يستجيب الدعا..ولا عاوز من الدنيا لا فلوس ولا نقدية..ولا أنا  
شحات ولا عاوز سلفية..أنا في الدنيا زاهد..واكلي وشربي من  
الهوا..يغذي بي ويغذي البر الثاني طائر من غير جناحات..يا جدي  
مسعود هات..لأصحاب الشكوي والانات..والفلوس في بيتك  
محفوظة..ويقول في سره "من بحث ابن المخطوطة".وجت الطوية في  
المعطوبة.جواب استلام وظيفة في مسابقة عملتها الوزارة الحريفة في

تطفئ الشهاب.. المرتب هباب والثبيت في  
الوظيفة بعد عشر سنين.. لا المرتب يزيد علاوة ولا أي إضافة إلا  
بعد فترة الاختبار.. فكرر واحترار وفي ايده كثر عيشه في  
العز.. ورفض الوظيفة.. ورجع للبير يغرف منه كثير وبركاتك يا  
شيخ "مسعود".. إذا كنت عيل صغير بيريل أو تاجر مخدرات اتقتل  
ومات أو شيخ طيب كان دمه قريب والبير اللي اتسمى باسم  
واحد من الثلاثة المساعيد وشعبنا الطيب حيفضل عايش على  
الحزبيلات والتهيزات.. وعاش مين عاش ومات مين مات.



### ثي..آي..بي

"صبر الزمان".. كان صابر لحد ما جه الزمان اللي يسمع فيه ألفاظ  
تشد الودان.. كلمات وعبارات جديدة غير ألفاظ زمان العنيدة.. لما  
الفقير يقولوا عليه على الحديد.. والرفيع زي البوصة.. والتخين  
خمين بوصة.. جسمه يقشعر لما يسمع روش أو روشنة.. وعبد  
الشیطان ولاد اللي عايشين في هنا.. لما بقوا كل حاجة في ايديهم

وما يبصوش إلا تحت رجليهم.. وكرامة أهاليهم تضيع والولاد  
تضيع.

أما أكثر كلمة بتترفضه.. في.. أي.. بي.. ما كانش فاهم  
معناها.. فأكبرها مجرد اختصار.. زي كلمة دبليوسي.. طلعت الكلمة  
معناها متين.. إما لواحد من أصحاب الملايين.. أو من الفنانين.. أو  
من المسئولين اللي على رقاب العباد واصلين ومتسلطين.

وكل ما يروح حنة هاي.. يلاقي لهم مكافهم وماحدش يقدر يقرب  
منهم والكل ينحني قدامهم.. والكل خدامين تحت الرجلين مادام  
لهم حاشية ومالية.. يعلم الله وحده مصدرها.. من بضائع مستوردة  
أو يبصدرها.. يصدر من الغالي من خير بلادنا.. خضار وفاكهة  
وزهور.. الأجنبي بيها مبهور.. وتتحرم على ولادنا.. ويستوردوا اللي  
يجيب داغنا.. بضائع تضيع أموالنا وقبل عيالنا.. اشي محمول في ايد  
القادر والمعلول ومش معقول ابن بهلول يكون شايله وأبوه مش  
قادر يشيل نفسه.. ونفسه مقطوع عشان يجيب القوت وابنه  
حيموت لو ما بعثش رسالة أو يسمع رنة.. وأصحابنا الـ  
في.. أي.. بي.. تزيد أموالهم وأطماعهم ويستوردوا المحمول اللي

بيصور..بكاميرا وفيديو..والعيال تتهبل اكثر ومصاريف أهلهم  
تكثر..وده يعمل جمعية أو يرهن رهنية..وتكون المصيبة القوية لما  
يصوروا صور خلية وأوضاع وضيعة ويتزوا بيها بنات  
الناس..يعني اللي خدوا لقب "شخص مهم جداً"..ملهمش أي  
أهمية أخلاقية..لكن قرشهم أو وضعهم هو اللي له أهمية.  
ولما نيجي ندور عن الأشخاص المهمين بصحيح..أصحاب الفكر ما  
تلاقش لهم ذكر ما دام فكركم ما يجيش فلوس وهو مرة في المطار  
قابل إسماعيل حلوس..جاي من برة ومعاها السكرتارية وعلى طول  
على صالة كبار الزوار..قال يا زمن يا دوار..بقى أسماعي حلوس  
اللي طول عمره منحوس..وكان بيستلف في الفلوس..لما كان  
صراف للشركة..ولف المرتبات..لما عمل نفسه مات..وحذف  
نفسه قدام العربيات..وخدوه على المستشفى وضحك على الكل  
لما مثل انه فاقد للذاكرة..ويسأله وكيل النيابة يقسم بالتلاثة انه  
مش فاكرك حاجة..وآخر حاجة فاكركها إن العربية طسته وهو معاها  
شنطته اللي فيها عهدته من مرتبات الموظفين..وراحت وسط  
الناس..ونفذ الهلاس بالفلوس وبقي اكبر مستورد لمبيدات الدهان

والناموس!!

والمرتبات كانت تعدي النص مليون جنيه.. في وقت كان فيه قيمة  
للجنية.. وبقي ييه وعمل منها خيرة تكبر وتزيد.. ومهما نقول ونعيد  
ونزيد.. الهبيشة بقم في الزمن كثير.. ولو حلفتولي على المية تجمد.. ما  
صدقش إن فيه واحد "في.. آي.. بي" قرشه من الحلال!!



### طعام.. ولفن عش للمصريين

"صبر الزمان".. دخل سوبر ماركت هاي.. واللي يشتغلوا فيه  
بيقولوا هاي.. موجود في مبنى من تقليعة الزمان اللي بيسموه  
مول.. على بابه عشرة من رجالة الأمن زي الكلب هول.. وأول ما  
دخل الهول.. وقفوه.. وسألوه.. لما اشتبهوا في منظره لكن ربنا  
قدره.. وكان معاه مبلغ معقول.. طلعه قدامهم.. دخلوه على  
طول.. يعني زبون مضمون.. وهيشترى وشاف اللي ما  
ينشاف.. مجموعة الخشاف.. في كيس نضيف مليون جوز ولوز  
وقراصيا ومشمشية.. مستورد من بلاد أجنبية.. تمن الكيس خمسين

جنية..ليه؟!..اصل الجوز من جزر الموز ما مستهوش ايد  
مصرية..واللوز من أمريكا الجنوبية..مسقي مية بسكر والقراصيا  
مرشوشة بالعنبر..والمشمشية..جامدة ومش طرية..ولما تنزل المية  
تكبر أربع أضعاف..وهو ده الخشاف..استيراد شركة أبو شناف.  
ودخل على قسم الخضراوات..لقى الخيار..الكيلو بتلاتين  
جنية..برضه ليه يا سعت البيه؟!..وطماطم مجففة..مش زي  
الطماطم المقعصة بسبعين جنيه..ومانجو كمان الحباية أربع  
ألوان..بميت جنيه الكيلو..ولما سأل البياع..ضحك وقال..دي مش  
مسرطنة..ما دخلش فيها مواد كيماوية من اللي استوردها ولاد  
المستقوية في وزارة الزراعة..هو أنت ما بتسمعش عن مستشفى  
سرطان الأطفال..اللي اتبنت بالتبرعات من كترة الجرعات اللي  
أكلها المصريين في زمن وحين كنا فيه غفلانين.  
ودخل على قسم البقالة..جينة مكتوب عليها منتجات  
حوالة..بيضا ورومي وريكفور وفلمنك..ومرسوم على العبوة  
مفك..الجنة البيضا..بالكيلو طبعاً خمسين جنيه..وباقى الأصناف  
من ميت لتلتميت جنيه..وتحت أمرك يا سعت البيه..ولما سأل

البياع ليه؟ قاله دي كلها مصنوعة من ألبان..من طيور نادرة في بلاد الإنجليز والألمان..مش من مصر بلدنا ولا من جاموسها..اللي فيها أوبنة وميكروبات..وتسبب في عدد كبير من الوفيات..ده "اورجانك"..واللي ياكله عمره ما يكش ملك.

ولفت نظره معلبات..فيها لحوم وخضراوات..العلبة بخمسين جنيه..برضه قاله ليه يا بيه؟!..البياع قاله أنت مش شايف اللي مرسوم عليها..كلاب وقطط..مستورد ومن بلاد بره..وعشان قاطعنا أكل المصريين بالمرة..لحمتنا طعمها مرة..وخضارنا يجيب لها مغص..حس انه قطع النفس..وقال آمال إحنا عايشين ازاي..وبناكل من الأكل اللي قدامنا..وايدينا سابقة أقدامنا. ودخل على قسم اللحوم..لقى البياع متخوم..وكل كيلو محطوط في ورق سولقان..ولها ألوان..منها الروز اللي يفتح النفس..والبمبي المسخسخ..اللي خللاه من الضحك يسخسخ..لما لقي الكيلو منه بميت جنيه وسأله برضه ليه يا سعت البيه؟!

قاله الروز لحمه لباني..لعجل وزنه بالكثير تلاتين كيلو..بتغذى على اللبن..وله مزارع من ازاز..زي الصوبات..وبياخد اللبن في بزاوة

في اليوم تلت رضعات..واللي بيربوه خبرا من هولندا ويقبضوا  
بالعملة الصعبة.

أما اللون البمي المستسخ..من لحم النعام ما بياكلش غير  
الحمام..وما بيخشش الحمام..عشان ماهوش فضلات وله زباين  
بالألوفات..اصل لحمه مضمون..ما دخلهوش هرمون..افضل أكل  
للي بيقف جون..عمر الكورة ما قفز شياكه.

ولفت نظره لحم له لون ما قدرش يحدده..ما بين الأبيض  
والأحمر..قاله ده بقى على سعره مش هتقدر.. "صبر الزمان" قاله  
هو أنا على اللي شفته هاقدر..خلصني وقولي ده لحم إيه..لحم  
ديناصور؟..يا سيدي دي لحوم الشيخ منصور..احسن صياد غزال  
في الصحرا الغربية..غزلان إيه..اللي هيا..ما يخشش بطنها غير كل  
نضيف..ده لحم غني عن التعريف.. "صبر الزمان" قاله هو ده لحم  
الغزال..البياع قاله ده طعمه عال ويشفي كل أمراض المعدة وكل  
ما تزود الجرعة..يزود السرعة وتطلع على التالت..ولا تحتاج  
حباية ولا سفوف يتشرب في كوباية..قال يا هنايا..وده تمنه  
كام..قاله متين جنيه..سعر شريط الحباية الزرقا..ويطلعك في السما



السابعة.

طلع من السوبر ماركت..وما رضىش يكمل باقي الأقسام..لا  
يمكن يكون فيه ونام بين الشعب الضعفان وبين ده الطعام..واستر  
يا رب على لقمتنا اللي ما فيش غيها حيلتنا ولحمة الجمعية اللي  
ريحتها منتسنة..وخيلنا في مونغارنا وفشتنا وكلاوينا وكرشتنا  
وكوارعنا..وأكيد رحمة ربنا حثملنا ويبارك في اللي يخش  
معدتنا..بس يطلوا قر علينا ويقولوا معدة المصري قضم  
الزلط..أكيد إحنا في زمن غلط..والمرض على الفقير انظبط..اشي  
فيروس سي..وفشل كلوي وسرطان..وأمرض أشكال  
والوان..والقر عليه جاب نتيجة وبقي حقيقة..ولفة واحدة على  
المستشفيات والتقليب في الحالات..والأهل في شتات ويكملوا عليه  
بأكل المستشفى اللي لو أكله عمره ما حيشفى.



### لقاء المناقشين

"صبر الزمان"..كان مذيع في برنامج شهير بيتقال بعد الفوايزير في

(٦٩)

الإذاعة..واختار شخصيات مشهورين وفنانين في نظر الناس غاية في الوداعة..في نظر الناس عندهم قناعة وهما آخر شراة..دائماً غضبانين وغير راضين..وسمى البرنامج لقاء الأحياء..وابتدى يجيبهم كل واحد يوم في حلقة..يبتدي الأسئلة باللين والآخر يدخلهم في حلقة..أول واحد فنان يحب كل زملائه وما ييكنش لحد منهم عداوة..أحلى من البقلاوة..وسأله عن الفنان اللي يقولوا عليه بتنجان..ضحك وقال ده احسن فنان..ولما واجهه برأى الفنان فيه شخصياً..وقال عليه انه أناني..طق من عينه شرار وقال..ده فعلاً بتنجان..هو فاكتر بصحيح نفسه فنان..ده شبه أبو قردان.

وطبعاً البرنامج بيتسجل حلقة حلقة..وما فيش حد يعرف اللي بيكرهه بيقول عليه إيه..وعمره ما يجيب الحق عليه..ولما سأل الفنان بتنجان عن الفنان اللي بيحاوره قال فيه احسن كلام..ولما ضيق عليه الخناق..وقاله انه رأيته فيك..انك فيك اللي مكفيك..ومحك بتنجان..برضه طق من عينه شرار..وقال ده راجل شبه الخيار..انت فاكتر الدور اللي كان عامل فيه حمار ولا الدور اللي كان عامل فيه زي الطور..يا عيني على الفن..ده شئ يجن.

والضيف اللي بعد كده.. كده وكده.. ممثل للشعب ونائب تحت  
القبة.. نبح باكتساح وقال لخصومه كُبة.. ولما "صبر الزمان" سأله  
عن سبب النجاح اللي باكتساح.. قاله اصل أنا رمزي كان  
التساح.. حاكم أمي زمان لما كنا فقرا كانت محنطاه على باب  
البيت.. ده أنا عملت صوان بطول وعرض الحيط.

قاله الناس وقتها كانت مقتعة بيك وقالوا ما حدش يمثلهم إلا  
سعت البيك.. قاله طبعاً.. دول أهل بلدي وعزوتي.. في قلبي وفشقي  
وكلوتي.

"صبر الزمان" قاله.. بس بعد الانتخابات غيروا رأيهم فيك.. بعد ما  
وعدتم تأكلهم بدل العيش كيك.. وضاع عشمهم فيك.. عنيه  
برضه طقت شرار.. وقال ما هو أنا اللي حمار.. كل صوت منهم  
عكسته.. شربته وأكلته.. سفن أب كيزان وكباب من عند  
الدهان.. وخسين جنيه للصوت فوق ده كله.. والآخر لأصلهم  
يقلوا.. المرة الجاية مش حارشح نفسي في بلدي.. وحتكون دايرتي  
مش منهم.. من أهل حقتي اللي في شركتي.

"صبر الزمان" قاله بس كده حيقولوا عليك.. اللي فات قديمه

تاه..اتترفز عليه وقال مش أنا الجاني..هما الجناة..عشان طمعانين  
وما يملاش عنيهم إلا تراب الطين..وقعد يسجل لناس  
كتير..مشهورة وفي الصورة..بين حبهم الظاهر لبعضيهم وهما في  
الحقيقة عاوزين يقطعوا بعضيهم..يتكلموا عن بعض حلول..ولما  
تزنقهم في خانة إليك..كل واحد يطلع الحق والمستحق في  
التاني..اللي باين من أمانى لكل واحد منهم بالخير للتاني.

ولما سجل التلاتين حلقة..عرضهم على مدير الإذاعة..طلع سيجارة  
ولعها بالولاعة وطرطق ودانه..وطفط على سنانه..وقال ده بقى  
لقاء الأحباء..جتهم ضربة..البرنامج ده يا صبر الزمان..تسميه لقاء  
المنافقين..عشان دول ناس مش كويسين..في زمن الصراحة اللي  
بيجاجة.

"صبر الزمان" بقى ميسوط ومزققطط..عشان كان نفسه يسمي  
البرنامج بالاسم ده..لكن لا كلام ده ولا ده ينفع يتذاع على  
المستمعين..هما ناقصين..الجرأيد مقطعاهاهم وكاشفة  
سترهم..وحسمع الناس كلام يغمهم..وقاله المدير لم الكلام يا  
صبر الزمان..وارميه في سلة المهملات لحسن تقليب علينا

الدنيا..والآقي نفسي أنا وأنت يا صبر الزمان نزلاء في الليمان.



### سلام ما توصلش للسطوح

إيه يا "صبر الزمان"..انت ما بتعيش كلام عن الثورة..حتقول إيه بعد ما بقى فيه أصحاب للثروة..من أبناء الثورة..بدايتهم سلم يطلع وعمره ما يتزلش وعمر النتيجة صايبه وما خايتش..وبعد ما اتشعبطوا في سلم الوظيفة ويقم فيها حريفة..وعمر الزمان عليهم ويتحكموا في كل الأمور..على مبدأ من مبادئ الثورة..المساواة في الحقوق والواجبات..ولا تفرقة بين الطبقات..وهم أول ناس يقم يفرقوا بين الطبقات..ونسوا طبقتهم الاولانية..أول جدودهم راجل على قد حاله..يمكن يكون حلاق أو عربجي..ومش قادر يقف على حيله..واللي في ايده انه يعلم العيال..في زمن كانت نتيجة التعليم عال العال.

وابتدوا يخترعوا عبارة "غير لائق اجتماعياً"..في وظائف حساسة..هما وصلوا ليها لما طلعاو السلم من أوله ونسوا

نفسهم..وأصلهم..ها دلوقت بقم إيه..ومركب النقص  
بيداروه..وكل واحد منهم اتنى يغير اسم أبوه..عشان الناس اللي  
يعرفوه بيعايروه..ويسدوا ودانهم وما يسمعوش إلا اللي بيحي على  
مزاجهم.

وزمان لما كان الغلمان يطلعوا الأوائل..يتعينوا معيدين أو على  
الأقل في وظائف كبيرة متشعبين..ولما يكونوا طلبة في  
الحقوق..لناس بتحافظ على الحقوق..يتعينوا وكلاء نيابة..وفي  
السياسة والاقتصاد..على السلك الدبلوماسي يحشوا بأيديهم  
ورجليهم.

لكن في الزمن الأسود..اللي بدأ في نهاية الثمانينات لحد الألفية  
المخفية للقرن الواحد والعشرين..بقم محرومين..يطلعوا السلم  
درجة درجة وتعدي عليهم أوقات حرجة..لحد ما يوصلوا لآخر  
سلمة..ويجوا يتحركوا ناحية السطوح..ما يلقوش العتبة..مع انهم  
عدوا ميت عقبة..ويتزلوا على جذور رقبتهم.

والحكاية ابتدت من مسئول عين ابنه في وظيفة امتداد ليه..وابتدى  
مسئول تاني يجاريه..واحد تاني وتالت ورابع في كل وظيفة مرموقة

العين عليها مخطوطة ولازم تكون من نصيب ابنه.  
وبقت قاعدة عامة.. وكأنهم كنهم اتفقوا بينهم وبين بعضهم.. إن  
الوظائف المرموقة تنحصر بينهم وولادهم وأحفادهم.  
والمضيئة إن لسه فيه شباب يكافحوا ويذاكروا ويتفوقوا مع أهم  
متأكدين أنهم حقيقوا محلك سر.. وحافهم ما يسر لا عذر ولا  
حبيب.. وتبتدي الخيل.. بإعلان عن الوظائف في الجرايد الرسمية  
لنزوم سلك العملية.. والمساكين رغم أنهم متأكدين إن الحكاية  
اونعطة.. بروضه يروحوا يقدموا للوظائف ديا.. والآخر يفاجئوا إن  
ماهو مش دية.. ولا يقدر يقدم هدية ياخذ شهادته ويبلها ويشرب  
مبتها.. ويترل لسوق العمل اللي كله توهمان بعد ما تأكدوا إن  
عبارة "غير لائق اجتماعياً" حائل دون تحقيق الأمنية.. ومحسورة  
على ولاد المستقوية.. ويكوشوا على كل الوظائف المرموقة هم  
ولولادهم ولأحفادهم.. واللي مش عاجبه يضرب راسه في  
الخط.. وهو ده شكل الزمان يا صبر الزمان.. لا حلم يتحقق ولا  
حد يحس بأمان.. الأمان.. الأمان من ده الزمان.. والغريب إن  
أصحاب القرار نسوا إن هما كمان "غير لائقين اجتماعياً" بحكم ده

الزمان..مش وقت لما اتعينوا زمان.



## وستوريا أسيابونا

"صبر الزمان"..زمان..كان يحب جرنان الأخبار..قبل ما تظهر الجرايد اللي بيسموها صفرا..وكان أول ما يقرأ..يختار فقرة أخبار الناس لأبو نضارة..أخبار خفيفة نضيفة..ولما كان اصغر من كده كان يقرأ مجلة سندباد وميكي وسمير وكروان..رحلة جميلة للأطفال..وكان يا ما كان.

ولما الزمن اتلخبط وظهرت الجرايد المعارضة..على كبر ابتدا يقرأها ويفهم فحواها..وليه بيسموها صفرا..مع إن الأخبار اللي فيها لسة طازة وخضرة.

ويبعجه رئيس تحرير..ولد خطير..شاب مثقف وجريء ويولع الدنيا حريق..لما قلسه يطول الكبار قبل الصغار..حتى اكبر الكبار..وعنده ادله وبراهين ما تخلهوش قدام القضاء مدين..واد متين..وقرا تعليق له على دستور بلدنا الحبيبة..اللي استحل خيرها الهلبية وخلوا



الفقير يكفر من فقره والزمن اللي قهره.

ولما سمع كلمة دستور..رجع بيه الزمان لحاله منصور..اللي لما كان يزورهم يخط على الباب ويقول دستور..والكلمة ما يفهمش معناها ولا مغزاها..ولما قرا في كتاب لغة تركية إن كلمة دستور المش..يعني يستأذن..عرف إنها متاخدة من لغة الأتراك اللي ربطوا شعبنا وحين..ولما كان يروح مع عمه للشيخة أم ذليخة..تستأذن هي كمان من الأسياد وتقول..دستور يا سيادنا..اوعوا تأذوا اني قاعدين في مكانا.

ولما وعى اكثر..عرف إن الكلمة معناها..القانون الكبير..أبو كل القوانين..وما فيش قانون يقدر يخالف مواده..واللي يحاول يتعرف عن حدوده..وكانه كتاب مقدس واللي يخالفه بيتي مدنس..وللحرية والديموقراطية بيونس وللعدل والقيم الحبيدة بيأسس..ولما كاتينا ابتدا يفند المواد..لقينا إن إحنا في واد والدولة في واد..وتعالوا نبص ولمادة مادة نرص.

المادة الأولى بتقول إن جمهورية مصر العربية دولة نظامها اشتراكي ديموقراطي يقوم على تحالف قوى الشعب العاملة..وفي المادة

الثالثة..وان الأساس الاقتصادي لجمهورية مصر العربية هو النظام الاشتراكي الديمقراطي القائم على الكفاية والعدل بما يحول دون الاستغلال ويؤدي إلى تقرب الفوارق بين النحول ويحمي الكسب المشروع ويكفل عدالة توزيع الأعباء.

وما نغفل الكسبات..نلاقها بقت قميزات..والتي عايش عاش والتي من عايش مات..والفروقات بين الناس بقت كبيرة..ملياديرات والتي بعدهم ميسارات..والناقي مخترق ومحصور في عشوائيات..لا مبه بشريرها ولا كهريا بنوروها..ولا حاجتهم كمان يعرفوا بنفسوها.

والاعباء بقت لنفقرا بس..هم التي بيدفعوا الضرايب والتي يشبلوا نتيجة المصايب..عاوزين منهم تبرعات للتي غرقوا في العبارات والتي راحوا في الزلازل..وانسخط الرجال وبقي عقله الصباغ..وحما وحدهم اللي يتحملوا الصداع والأمراض والأوجاع..والمستشفيات العامة مليانة منهم..مخطوطين في سراير زي الأشباح..ولا دكتور عدى عليهم ولا راح..ولا علاج مصروف..ولا عملية لكلبة ولا غضروف..وبقت الاشتراكية

مهلبية ياكلها القادر الفاجر والغادر اللي بقى أعمى  
النواضر.. واتملك مصر لعدد محدود.. حددته الإحصائيات بتلت  
آلاف أسرة.. لهم كل أدوات الإنتاج.. توكيلات وسياحة واستيراد  
وتصدير.. وقصور ممنوع الاقتراب أو التصوير.. وبقي لهم مصايفهم  
ومتعتهم ونواديهم.. وتدور عليهم تلافيفهم مجموعة اتكونت من  
جنود لأسر مائكة.. وناس من ثورة يوليو علقوا للناس  
الفلكة.. ومجموعة صغيرة بقت مملوكة.. وجموع الشعب الصغيرة  
بقت متهالكة.. والبنك الدولي حصر أعدادها.. أربعين مليون بالتمام  
والكمال.. اتدهورت بيهم الأحوال.. ولازم يتعبوا كلهم في شوارع  
ويرموهم في النيل.. لحسن ريحهم وحشة وما تعجيش الناس الهاي  
ويقولوا أف.. يا باي.. يا ترى الدستور ده بتاع بلدنا.. ولا بلد في  
الخيال.. اللي بقى من الخيال إن يكون ده دستورها.. ودستور يا  
أسيادنا.

و"صبر الزمان" بعد ما قرا المقال.. قال يا زمن اسود ومنيل.. ده أنا  
واحد من الأربعين مليون اللي تحت خط الفقر عشان دخلي  
المهموم ما يزدش عن ستة جنيه في اليوم.. عشان كده أنا

مفروم..وما اعرفش إذا كنت صاحي ولا ما قمتش من النوم..ده  
أنا ما دقتش الفتة أم توم من ميت يوم..ولا عنت باسمع عبد  
الوهاب ولا عبد الحليم ولا أم كلثوم..اللي كانت أغانيهم الوطنية  
تخلي الدنيا تقوم..يبقى الأحسن ليا أصوم..والصوم خير وعاء للي  
ليهم في الضريبة..وعاء..ودائماً في عواء..والواد مهما يقول  
واء..مش حتلاقي لبن للبازة عشان نسكته..والأحسن نخط ايدينا  
على بقه ونكتمه ونريجه من زمن جاي ما ينفع فيه غنا على الناي.  
بس بقى ومش لازم تتشائم يا صبر الزمان..ده ربنا رحمة أوسع  
وينجيننا من النار اللي بتلسوع..وكويس إن الدنيا لها آخرة عشان  
اللي اتحرم فيها..يعوض عليه ربنا بأشجارها وثمارها ولبن  
أثمارها..وإذا كان دستور البشر اتملط..نرجع لدستور الخالق الخالي  
من الغلط.



### هنا فيه..هناك لاء..عنرنا ما فيش

"صبر الزمان"..كان له صاحب من أصحاب زمان اسمه سعيد  
أمان..راكب عربية اللي هيا..وواقف بيشتري سجائر أجنبية برضه

من اللي هيا..سعر العلبة خمستاشر جنيه..بيبيعها محل وحيد في  
شارع محمد فريد..ولما لحه..قرب منه وعرفه بنفسه والراجل ما  
كدبش خبر..نزل فيه بوس وأحضان..فكره بمدرسة نولة  
السمان..زمان..لما كانوا أصحاب..وكل واحد منهم أمه حاطة له  
حجاب..عشان يكفيه شر الحسد..حاكم الاتنين كانوا اشطر عيال  
في المدرسة..وكل واحد مشى في طريقه..وصاحب "صبر الزمان"  
خريج حقوق..وكان متفوق لكن ما اتعينش معيد..وابن الدكتور  
سيد أبو حديد اتعين بداله..لما اتعمل إعلان في الجورنال على  
مقاسه..ولما راح للنسيابة..حس انه دخل غابة..والوظيفة دي  
محجوزة..للي ساكن في العجوزة..اللي مستواه الاجتماعي يشرف  
الوظيفة..وطبعاً رجع بقفاه..واتعين في وظيفة حكومية..ومحلك  
سر..ولا مستقبل ولا طموح..لكن في الآخر معاش.

ولما اتخرج ابنه "سر الزمان"..كان مصيره مصر أبوه واتخرج من  
كلية التجارة..والتجارة شطارة..لا هي علم ولا علام ولا  
شهادة..والحاج "عبادة" عنده خمس محلات..ماشية بالتيات  
والنبات..من غير دراسة ولا قرابة سطر في كتاب وكراسة..ولما

عرف إن صاحبه سافر بره..عرف السر ومن غير ما يقر..قاله ربنا  
يزيدك من نعيمه..وفكره بالوله كيمو ابن نفادي البريمو..اللي كان  
معاهم في المدرسة..وعمر ما نمرد كانت كويسة..برضه سافر  
بره..قابله هناك ودلوقتي ياما هنا ياما هناك.

وبعد كده سأله عن حالة..اللي باين من قميصه وسرواله..قال  
الحمد لله..أهي ماشية..صحيح بالنزق والدق..لكن ماشيه..ولما  
عرف إن صاحبنا عنده شركة كبيرة..بتصنع البيرة..اللي عرف سر  
صنعتها من المصنع اللي كان شغال فيه في هولندا..عرض عليه  
يشوف وظيفة لابنه "سر الزمان"..والراجل رجب وعمل بأصله  
الطبيب وشغله في سكرتارية مكتبه..والراجل بقى فحودج يحلم بيه  
ونسى خط سير أبوه..نفسه يشعبط في حبال الراجل ويعيش  
عيشته وابتدى يحط مناخيره في كل صغيرة وكبيرة..والراجل لما  
لاحظ طموحه..قربه منه اكثر وبقى سكرتيه الخاص..بقى يجيب  
طلبات أهل بيته..وساعات يشرف على غيطه اللي بيتزرع فيه  
الشعير لزوم البيرة اللي عمل منها خميرة.

والسراجل فكر يدور على مكان له خصوصية..زهق من دوشة  
المدينة..ووقع اختياره على سكن في مدينة الأماني  
"هوب لاند"..و"سر الزمان" كان يشرف على فرش  
السكن..وراح هناك وانبهر..بالحدائق والفيلات وحمامات السباحة  
والمسولات..والمدارس الأجنبية والسييمات..معقول المكان ده في  
مصر..واللي ساكنين فيه مصريين..طب ازاى ومنين؟!

ورجع على بيتهم تايه..حكى لأبوه "صبر الزمان" على اللي  
شافه..ما بقاش عارف قافه من كافه..وشوية لقوا في التليفزيون  
إعلان..عن مدينة الأماني..بيقارن فيها بين مكان تاني..ويقول هنا  
فيه..وهناك لأ..هما صحيح شيهنا بس مش زينا..هنا ملاعب  
جولف..وأصحاب القطط السيامي والكلاب الولف..صبر  
الزمان" ضرب كف على كف..الجولف لعبة مصريين؟..اتعلموها  
فين؟..ما كانش فيه غير الحكشة ولعبة البلي.

وشوية والبيت اتطريق..لحق "صبر الزمان" ومراته "فرسة الزمان"  
وابنه "سر الزمان" وبنته "طنقة الزمان"..وجروا على  
السلم..ومافيش ساعة ويقم في الشارع..هما وعشر اسر كانوا


ساكنين في البيت..كان مداريهم سقف وحيط..ومستول الحى كان  
زمان ما يعرف بنام إلا لما يندبر لهم سكن..النهاردة المستولين في المية  
الباردة لايديهم حاطين..ويوعدوا ويغلفوا ومصيرهم بقى في  
مساكن الإيواء العاجل..وخيمة على قدوم ساعتهم كلهم.

وجرى "سر الزمان" على صاحب أبوه وحكى له اللي حصل  
لهم..وهو وأبوه كان متهيء لهم انه حبيب لهم شقة..قال لأ يا  
حدوقة..انت صحيح سكرتيري اخصوصي لكن كل شى وليه  
حدود..وانت مرتبك مهما زاد برضه محدود..وأنا ممكن ادبك  
إعانة..اصل أبوك من الفنة العبانة..اللي راضية ويتسعد إنما  
جعانة..وما عندكوش طموح..وهو ده نصيبه في الحياة..لازم  
يرضى بيه.

وراج "سر الزمان" على أبوه..وقال على الكلام اللي طلّع من  
الراجل اللي كان فاكروه زي أخوه..وما كانش قدماه غير انه  
يقول..هنا فيه..هناك لأ..وأبويا قعد يقول وعندنا ما فيش..وما  
عندناش ريش عشان نفشه..لازم يا مراتي انتي وولادتي  
تتقشفوا..اصل اللي كانوا بيختشوا..قالوا عليهم ماتوا..وسبحان



موزع الأرزاق... بحساب ومن غير حساب.. والتاريخ وصفحاته،  
بيقول إن الفتر موجود في بلدنا على مر الزمان.. والغنا فيه  
محدود.. والشاطر اللي يعدي الحدود.. ويطلع من الطبقة الفقيرة.. ما  
عندش فيه نعيم أخلاقية.. تحسن الميراثية.. والله ينتقم من ولاد  
المفتورية.. اللي وصلوا بلادنا لده الحال.. والأعمال ما حصلش  
البطل.. اللي سكن مدن الأمان والأحلام بقت حقيقة مش كلام أو  
أفلام.. وجل من لا يسهو ولا ينام.



### آخر السنة وأولها

"صبر الزمان" بين الحين والحين.. يطلع الجرايد اللي بيحتفظ  
بيها.. يقعد يقلب فيها ويحلل ما بين السطور من الظاهر  
والمستور.. لقى إن آخر سنة ألفين وخمسة مئان،  
بالأحداث.. والأساس فيها.. الانتخابات البرلمانية.. ومفاجآت  
الديمقراطية.. جنازير وسلاح أبيض ورشاوي من ألف جنية وهدايا  
عينية من سعت اليه مرشح الدايرة.. بطاطين وقفاطين.. وغلوس

تنصرف بالملايين.. عاوزين إيه؟!.. يبقوا تحت قبة البرلمان.. بسرعة  
نظّم لها الإخوان وأحزاب المعارضة بقى في حبس بيض.. ووداعهم  
محتاجة قملبص.. وتظهر التفاليس في أفكار ومبادئ.. ويموت ضحايا  
كثير.. دول تبع الإخوان ودول تبع الوزير.. ونخش في فوزير  
ماغشاش حل.. وقالوا إن الشعب بقى واعى وما فيش داخى حد  
يشكك في نزاهة الانتخابات.. وتطل السنة الجديدة ألفين  
وستة.. وحوادث ستة تيين إن الشعب بتاعنا غريب.. ساعات يحب  
انعمار وساعات يحب التخريب.. أولها غرق العبارة.. اللي ماحدث  
لاقى عبارة.. يوصف بيها أصحابها.. وهما متحصنين.. بيلمان دفعه  
لدخوله الملايين.. والثانية نخش على أنفلونزا الطيور.. اللي حدد  
طنسوح التاجر المسعور.. اللي غلى أكلة الغلابة.. ولجيوهم  
هلابة.. واللى جمعه في سنين راح في ثواني.. والثالثة مباريات  
أفريقيا.. نسى الناس الحداث الأولانين وهات يا تشجيع لفريقنا  
الشجيع وأغانى تتألف ودعاية تتكلف وشباب روش اتولف وسلك  
أعلام وفي الوش رنوش أشكال وألوان.. وكأننا مش في مصر.. في  
أوروبا أو أمريكا.. صحيح الفرحة حلوة وسط الأحزان.. لكن دي

ظاهرة تستحق الدراسة..والحماسة..خدت المصريين زي كل المسلمين وبقت هوجة ضد الرسوم المسيئة..وبقى الحدث الرابع..المهم كلهم داخلين في بعضهم..وكل حادثة تغطي على الثانية في اقل من ثانية..والخامسة حس الصحفيين..وتعربة الفاسدين اللي كل يوم ربحتهم بتزيد فوجان..والشعب الغليان..يحط ايده على خده ويقول..كنا فاكرين ان الدنيا بخير..وبقى فيه جذب..ولا يحله الصوم في شعبان ورجب..وانحصر الخير على عدد محدود من الرأسمالية الجديدة..اللي فاقت أيام الملكية ووفضايح فنانيين..ممثلين ومطربين..خيافة وتروير واللي كانوا رموز وقدوة..وقعوا في الهوة وبقم رد سجون..وفيه ناس محدش يقدر يقرب منها..مش لأفهم اغنيا وبس..وبيلدور حواليتها الغمز واللمز والهمز..نكن فيه سر..وماحدش يقدر يقرب..ومش كل فاسد له نهاية..أمال إيد الحكاية..ماحدش فاهم حاجة..ولا يقدر يقول اشعنى..والغريب إن اليوم بيجمعنا من صباحه وضهره وعصره وليله..وبعدي ومحسوب من الأعمار..ناس فيه جاعت وضاعت..وناس لبست وانفسحت وصرفت بالملايين..وما تقدرش

تقول جابوها منين في اقل زمن وحين.

والحادثة السادسة..فضايح الخصخصة من عمر أفندي لشركة  
تليمصر..تشريد عمال ينضموا لطابور البطالة..وفضيت الحصلة لما  
التأمينات بقت تبع المالية اللي تسد بفلوسها الأزمات وتظبط  
الميزانيات بعد مناقشتها تبان فضيحتها قدام نواب الشعب..دلوقتي  
بقى زيتهم في دقيقهم ومن دقنه وافتله..وظهرت في قاموس  
تصاريحهم كلمة "شفافية"..كلمة كلها تورية..زي اللي قالوا  
للكذاب احلف..قال وماله..ميت حلفان..المهم الحقيقة مش  
حتمان..يا ترى الجرايد حتقول إيه في الأيام اللي جاية والزمن مخبي  
لنا إيه؟..يا رب احمي الناس الغلابة من الناس الهلابة وانت اعلم  
بحالهم..وشوية صبر كمان..يا صبر الزمان..يمكن تتحسن  
الأحوال..ويتعبي الزمن ده بمساوئه في شوال ويدفن في حفرة  
عميقة ويترش بالجير زي فوازيرو أنفلونزا الطيور وبعد الثمر يتكشف  
المستور.



## رحلة الخيال في حال.. حال العال

"صبر الزمان" حكى وقال..كلفني مديري الأستاذ "عبد العال"..في وزارة الثقافة بعمل جولة آخر قيافة..في قصور مصر واستراحاتها..في سواحل مصر ومدنها وواحاتها..والغرض إعداد تقرير عن مصادر الثقافة في أساسها..تمثيلها ولوحاتها..من أول السرير اللي كان ينام عليه الملك..اللي كان يتحرك بزميلك..وراح ومهره اللي شافه من أثاث مرصع بالذهب والفضة والالماظ..وتمثيل طلياني تبين المزاج الجواني لسكنى القصور..حياتهم زي حياة ملوك إيطاليا واليونان..في زمن كان انقضى من زمان وما بقاش منه إلا اللي موجود في قصر مصر واستراحاتها.

مفارش سراير وترايزات..متطرزة بخيوط من فضة وذهب..وأطقم صيني وملاعق ذهب..قعد يدقق فيها..وسأل المسئولة عنها..قالت له دي كانوا بياكلوا فيها أكل البهوات..يتحط فيها رومي وطواويس..مش ملوخية اورديجي أو فروخة فطيس..قالها والطقم ده يجي منه كام..قالت له دلوقتي ولا زمان..ضغط على سنانة وقالها دلوقتي وزمان..قالت الوثائق الموجودة بتقول تمن الطقم في زمانه في

الأربعينات..تلت تلاف..وفي الزمن الحالي تحفة ما تتفقد  
بمال..اتعرض من مليونير نمساوي للتحف غاوي..يدفع في الطقم  
الواحد تلتمت ألف..عقله لف وقال ده إحنا فرحنا لما أبويا جاب  
لنا في الستينات طقم ميلامين..كان بدعة..والخدعة انه ما  
بينكسرش وأول ما يطب الأرض يبقى حنتين بالعرض.

وفضل يلف في القصور..في عالم مسحور..ويقول معقول يا ولاد  
مصر..اللي التاريخ كتب عنكم في الأربعينات..إن اجعص واحد  
فيهم كان شحات وناس تبات ومعدنًا تصوصو من  
الجوع:..ويصقفوا للملك والقلب موجوع.

ولقى حمّام في قصر من القصور حنفياته ذهب وفيه مية سخنة  
وباردة..ميته تنزل على الدماغ اللي عمرها ما كانت  
شاردة..وافتكسر لما جاب سخان وبوتوجاز وبطل يسخن على  
الوابور ابو جاز..امتى؟!..في الثمانينات لما انتشر بين كل  
الفتات..ولقى بوتوجاز بعشر عيون وتلاجة ماركة  
فرجدير..وجاب مارشدير لما افتكر دخول التلاجة في الستينات  
حلّم أهل الفتات..قال للمشرفة على القصر..إحنا كنا فاكرين إن

الأجهزة ديا.. ما طلعتش إلا لما جنبها.. فرحنا بيها وزيناها بخمسة  
وخمسة من عين خالتي نفيسة.. وفاكر لما أمي كانت تدبح  
بطة.. تقوم حاطة سكينه فوق المصفة والبطة جواها تتمتع طول  
الليل بهواها.. ولا تلاجة ولا يحزنون.. والمية في القلة سقانة ترد  
الروح.. وريجة الماء ورد منها تفوح.. وفاكهة طازة اخر لذاعة تتاكل  
في ساعتها.. ضحكت المشرفة وقالت له انت مش عايش في  
الدنيا.. الناس الايام دي بقت حاجة تانية.. بعد العز والقصور ما  
كانت لفئة متحددة.. النهاردة متجددة في الاحياء الجديدة.. روح  
امتداد شارع الهرم.. حتلاقي قصور بالكوم.. كل من هب  
ودب.. مفتح ومدب وعددها بالالوفات.. لفئات.. كانت لحد زمن  
قريب.. الدموية من وشها يتهرب ومنهم اللي يهرب.. واللي  
بسلطته بيكهرب كل اللي يقف في سكتة.. بوتوجازات انتيكات  
وفازات وتلاجة بتشتغل بالليزر.

وبعد رحلته كتب تقريره وقال الثقافة اللي في اللوحات  
والادوات.. ما فيش ريجة مصر فيها.. طلياني وانجليزي  
ويوناني.. خلتي اضغط على سناني واقول آه ياني.. وان افكرتم ان  
زمن القصور وصحابه فات.. دلوقتي موجودة مئات المرات.. لا في

السعودية ولا الكويت ولا الامارات.. في مصر واصحابها معاهم  
بطاقات تؤكد انهم مصريين.. لا وارثين ولا في اللوتارية  
كسبانين.. ولا معاهم مصباح علاء الدين ولا خاتم  
سليمان.. والمستحي بان.

وانا كنت فاكر ان منتهى احلامي في شقة اسكان حكومي وداهية  
دقي وبيا دنيا قومي لو سألنا عن ميعاد التسليم.

والحمد لله ان احلامي على قد لحافي.. والبال رايق والذهن  
صافي.. والحمد لله لابس جزمة ومش حافي.. وموتبي كافي.. والاحلام  
رحمة لانها مجرد خيال.. تحقيقه في زماننا محال الا اذا كنت نصاب او  
محتال.



### الله الزمان والموظف الفففران

"صبر الزمان" حكى وقال.. عن الموظف "وقف الحال".. اللي بيقتعد  
معاه على قهوة المعاشات.. ساب الوظيفة من تلت سنوات.. وعنده  
ولدين وتلت بنات ومعاش خمس ميات.. كانوا زمان عايشين في



تسبات ونبات..خايف من اتفاقية الجات..حتغلي الاسعار والدنيا  
تقيد نار..والراجل قاعد يكلم نفسه ويشد في الجوزة وانقطع  
نفسه..قاله "صبر الزمان" ارحم نفسك يا ابويا..الراجل قاله  
ازاي..والحياة بتقولي باي باي..البنات داخلين على جواز ولازمهم  
جهاز..خشب والمونيا وازاز..والولدين في الجامعة..وتتول من عينه  
الدمعة..ويقول حرام العيشة بقت والعة..فين ايام زمان..لما الموظف  
كان..له قيمة..وظيفة محترمة والحياة كريمة..لما اتوظف في اخر  
الستينات بعد ما اخذ بكالوريوس تجارة والجسم كان فيه حيوية  
وحسرة..والمرتب سبعتاشر جنيه..يجيبوا من اللحمة بالكيلو اكثر  
من ثلاثين..والمعاش خمسمية دلوقتي يجيبوا اقل من عشرين عشان  
كده بقينا ليها مقاطعين..وقام الراجل واتنفض..وقال لصبر الزمان  
تعالى معايا..نركب سوا الة الزمان..اللي حترجع بينا  
لزمان..كان..وما كناش راضيين عنه..دائماً نشتكي وما كناش  
نعرف قيمة الحياة..دلوقتي بنلطم ونقول يا ريت اللي كان يرجع  
زي ما كان..بالسبعتاشر جنية ارجع تاني سعادة اليه.  
"صبر الزمان" عنده فضول..قال ارواح معاه حتى لو كان

مهبول..ووصلوا لحي شعبي وقعدوا قدام بيت قديم..ونادى على  
الحریم..وقالهم خدوا لكم ساتر..معایا ضیف..**"صبر الزمان"** تنحنح  
وقال يا ساتر..والراجل بدل ما يدخل معاه شقته..طلع بيه على  
السطوح ووراه لعبته..صندوق خشب كبير وله باب وجواه  
كرسين..وقال اتفضل ادخل يا نور العين..مش ح تصدق اللي  
حتشوفه العين..وقعدوا على الكرسين..وراح الراجل زايع  
ستارة..لقى شاشة تليفزيون متركبة في الصندوق..وطلع من جيبه  
مصاصتين وقال لصبر الزمان دوق.

وقعد يشغل الزراير..**"صبر الزمان"** قاله ما فيش شئ ظاهر..قال  
اصبر شوية يا صديقي..دلوقتي نخش على الارسال..والبطال حيبقي  
شغال.

**"صبر الزمان"** بص على الزراير..لقى واحد مكتوب عليه السنة  
والثاني اليوم والثالث الساعة..والراجل قال اشتغلي يا  
معماعة..عاوز صوت اعلى من صوت الاذاعة..لما كان صوت  
الجماعة..زي العصافير..دلوقتي بقى صفر..يزن في وداني طول  
الليل..بتوريني الويل..من شخير ينيم الغفير.

"صبر الزمان" أدرك إنه لاسع.. والراجل قاله سامع؟.. قاله ما فيش  
أحلى من كدة.. وراح ضاغط على زرار تاني.. وقاله الصورة ديلوقي  
تظهر.. وافرجك على أحلى منظر.. ليلة زفافي على أم  
كفافي.. وقعد يهيص ويزيط.. وشوية يبكي ويعيط.. ويقول شاي  
يا صديقي.. "صبر الزمان" خده على قد عقله وقعد يجامله ويقول  
شاي.. بس باين عليك كنت خايف.. الراجل بقوله من حلاوة  
الشفاف.

وقعدوا أكثر من خمس ساعات.. والراجل يضغط على زراير وما  
فيش شئ مسموع ولا ظاهر.. أتاري الراجل بيراجع زمانه في دماغه  
وفاكر إنه شايه وكاشفه.. لكن العملية مش أكثر من أماني إنه يعيد  
الزمن الأولاني ويبكي على ليلاه وتطلع منه الضحكة وساعات  
الآه.

و"صبر الزمان" خرج من الصندوق.. عرقان ومخنوق.. والراجل  
طلع مصاصة وقاله دوق.. خد بعضه وجرى من قدامه على السلام  
والسراجل وراه وشده من قفاه.. وولاد الراجل خرجوا من الشقة  
ولحقوه.. وقالوا له إنفد بجلدك يا مسكين.. وجرى على السلام

ومش عارف إنه في حقيقة ولا حالم.. وطلع من باب البيت وبص  
لفوق.. وقعد يقول الله يلعن اللي يفكر زيك يا راجل يا مجنون.. ده  
أنا حابغ عنك السرايا الصفرا.. إنت يا راجل شارب حمرة.. الزمان  
ما يرجعش لورا.. إيه اللي جرا.. الراجل قعد يحدفه بالطوب من  
فسوق السطوح وقاله.. بكرة حيمر عليك الزمان ويطلعلك قرون  
زي الخرفان.. يا راجل يا خرفان.

### تفائل يا صبر الزمان

"صبر الزمان".. قابل صديق الطفولة.. شريك برائه.. في لعب  
زمان.. البلي والنحلة.. وصيد ابو المقص.. ورصد حركة النملة.. وقاله  
زماننا كان.. صاحبه قاله وزماننا لسة موجود.. بس مش فينا.. في  
ولادنا والعواجز من أهالينا.. اللي لسه يقبضوا معاشات مكفياهم  
ومش حوجاهم لولادهم اللي مش لاقين شغل ولا وظيفة.. والجنينة  
بقى في قيمة التعريفة.. لكن فيه حاجات إتعملت في البلد  
كثير.. على مدى عشرين سنة.. المدارس إتضاعفت خمس

أضعاف.. والمدرسين بقم آخر قيافة من الدروس الخصوصية.. حالهم  
أحسن من حال أستاذنا عطية.. اللي كان ما يغيرش بدلتة ولا  
قميصه ولا حتى كرافتته ولا جزمته.. شفناه بيهم أول ما دخلنا سنة  
أولى.. لحد ما وصلنا لسنة ستة.. وما هيته ثابتة.. والعلاوة خمسين  
قرش في السنة.. دلوقتي بقم في هنا.. لهم شقق تمليك.. وشاليهات في  
الساحل الشمالي.. ووعي تقول وأنا مالي.

والبلد إتملت أنفاق وكباري.. إشي تحت المية وإشي فوق  
المية.. والصناعي بقي بياخد يومية تعدّي المية.. وبقي له قيمة في  
سوق الجواز.. وزمان كان من عرة العلمان.

واللي كانوا يركبوا عربية ملاكي عندهم محدود.. أصلهم وماليتهم  
ممتدة من الجدود.. والنهاردة اللي ما كانش له قيمة ولا  
وجود.. راكب عربية آخر موديل.. "صبر الزمان" قاله بس فيه ناس  
لسه شايقة الويل.. صاحبه قاله.. أكيد دول كسالي.. والشاطر  
يعافر.. والمساكن بقت عشر أضعاف.. صحيح هي غالية على  
الضعاف.. بس الأكيد يا أخي إفا بتسكن.. وحتقول الفلوس  
منين.. ده غير اللي عندهم ملايين.. إنت ناسي إن أغلب سكان

مصر في التمانينات كانوا يراها..سعوديه  
وكويت وإمارات وعراق..موظف وعامل وفلاح وصناعي  
وحلاق.

إنت عمرك يا "صبر الزمان"..سمعت إن فيه حد في مصر مات من  
الجوع..ولا صحفي بقي من الكلام ممنوع..قاله بس الراحل بقي  
من مراته مخلوع..والعامل بقي من مصنعه منخوع..صاحبه  
قال..بس بياخد مكافأة يعمل بيها مشروع..تفائل يا "صبر  
الزمان"..إزاي بس أتفائل وما عدوش بيعينوا الاوائل..والدنيا  
مقلوبة..مظاهرات من حركات..كفاية وشايفنهم..والجرايد بتقول  
إن ميزانية مصر منهوبة..الطوبة جت في المعطوبة لما اتمدت إيديهم  
لفلوس المعاشات..وأنا فاضل تلت سنين وأبقى من  
المركوبين..والقضاة زعلانين..والمهندسين قرفانين..وأساتذة  
الجامعة متزمرين..والاخوان راصدين لأصحاب رأس المال اللي بقم  
لبلدنا محتلين..والوعود الانتخابية..قضاء على بطالة وإنشاء مصانع  
وإستصلاح أراضي ورفع مرتبات..وأهو عام عدى سنوياً والمرتب  
قالوا حيزيد مية مية بعد ست سنين يعني بحسبة بسيطة ١٦ ٪

وبقدرة قادر رجعت في الميزانية ١٠%..والعام فات ولا اتحقق  
حاجة..والحكومة بقت محتاسة..والديون الداخلية عدت مرحلة  
الامان..وتقولي اتفائل يا "صبر الزمان"..اللحمة عدت ثلاثين  
جنيه..والفراخ اسعارها ولعت نار..بعد اللي منها غار..ادفنت في  
مزارعها والبيض اكل الفقير..بروتين الصغير والكبير..حيوصل  
سعر البيضة خمسة جنيه وتقولي اتفائل يا سعت البيه..ازاي وليه.  
"صبر الزمان" قال انا ما افكرش ان من سنة تمانين لحد بداية  
الفين..لما قفلوا العشرين..كنا لحد كبير مطمئنين ان الدنيا لسه  
بخير..وابدت الالفية وبانت النبة..تجار بقم جشعين ورأسالين بقم  
متوحشين ومتوغلين ومكوشين.

صاحبه قال..يا اخي مش كلهم..وبلاد الدنيا فيها اللي  
مكفيها..بلاد اغنى منا وافقر منا وفيها بلاوي اكثر من  
عندنا..تفائل يا "صبر الزمان".

سأل صاحبه وقاله..يا اخي انا نسيت اسألك انت شغال ايه..قاله  
موظف في مصلحة الضرائب.. "صبر الزمان" قاله امسك المال  
السايب..صاحبه زعل منه وقال انت حتبدي تتجاوز الخطوط

الحمرا.. وحتمسك بإيديك الجمرة.. حاكم انا في الحزب اياه.. اللي  
بيدور على سبيل النجاة للشعب حييه اللي حته من عينه.  
"صبر الزمان" قال تاني.. امسك.. عشان كده.. ويا ترى شغلتك ايه  
في الحزب.. صاحبه قاله انا في لجنة الشباب.  
"صبر الزمان" فطس على روحه من الضحك.. قاله وانت عندك  
سبعة وخمسين سنة؟! عشان كده ما عدش فيه شباب  
بصحيح.. العواجز بقم هما اللي يمثّلوا الشباب.. يعني انتم حلّيتم  
مطرح الشباب.. ما هو ما دام فيه الحبة الزرقا.. جزمة لميع وبدلة  
لبنى وكرفّة حمرا.. انتم ما ينفعش معاكم الا العين  
الحمرا.. يا.. صاحبي بتاع زمان.. ياللي بتقدر تسلك وتعيش في كل  
زمان.

تمت بحمد الله

٢٠٠٦/٦/١٥



# الكاتب في سطور

✦ عادل عبد المجيد القنصل.

✦ مواليد ١٩٤٩/٧/٢ القفازيق.

✦ لواء شرطة سابق.

✦ حاصل على ليسانس الحقوق و ليسانس

الأدب لغات شرقية

✦ مؤلف بالإذاعة والتلفزيون وعضو اتحاد

الكاتب.

✦ صدر له مجموعات قصصية:-

وانور أبو الور-قنعة صفر-حدي وحدي-حيات-حلاية واشد-نقطة انصت

✦ مأمورية زفاف عفاف-قيد اغصن صد عفريت-مفاهيم محتاجة تفهيم ١،٢

عنى رصف سبس-نور الدين والكذب عتتر-احوال العاد في زمن العاد.

✦ روايات:-

سحين زفق-الولد رومانسي-عطر العرافة-البوابة-زهرة الفصول-أرب سرق

عمري-نقطة في زمن السيد يساعمر-جعفري وبديع انعمري

أبناء العم وسام ٣،١،٢ - الكنف-كساري قطع خاص-اخلل

والقارب ١-م. صاوي الراوي ١٩٩٥-أطراف مدينة-أوراق نادرة-اخلل

والقارب ٢

✦ قيد النشر:-

أبناء العم وسام ٤-اخلل والقارب ٣

-صمام حري-حورية البحر-فراشة البراي-قلوب مسنة

حقوق الطبع محفوظة للمؤلف وعنوانه

بوسعيد حي ٦ أكتوبر ع ٨٠ ش ١٥

إلى اللقاء في العمل القويم ياؤن الله.



# فراشة البراري

رواية

عادل القنصل